

明史彙

志第四

光祿大夫 經筵講官明史總裁戶部尚書加七級臣王鴻緒奉

敕編撰

五行一本

五行之說本於箕子其配之以五事而以某事之應當之則自漢儒言災異始然董仲舒劉向歆父子以春秋合於書指已然之事爲徵不免牽合附會互相牴牾時孟李尋翼奉京房之徒參以他說遙揣未然之事則又不免鑿空荒唐難以據依於是歐陽修力詆五行傳之譌書事而不言應曰此春秋之旨也宋元之史悉仿唐書條目稍增皆削徵驗不載然歐陽氏特不言所驗而未嘗不引所占夫驗之於占猶影響

之於形聲也言占而必及於驗所以昭其戒言占而不及於驗所以絕其誣二說並存不可偏廢若但斥以爲誣而盡去其說則前代帝王因日食星變風雷水旱之災使羣臣上書指某事之失以爲修省者亦皆可以不必矣豈遇災知懼之意哉是故有是占而的然有是驗者并書其驗可也有是占而未嘗的然有是驗者但存其占可也矣漢諸儒稽古過篤憑理以談天人近於尼而未化矣然自歐陽氏之說行而後世之言災異者愈疎記徵應者亦罕第可據實錄所書及野史之不妄者存之以備參考而已宋書創立符瑞不可以爲典訓齊金二史更五行曰災祥未爲無見顧災多而祥少且志祥亦近於符瑞唐書削而不錄其大者載於本紀小

者不死有也宋史則以甘露醴泉靈芝嘉禾等一切謂之及  
三隋之災變皆祥之列則屬矯之過者審如是則

漢圖書書何以言鳳凰詩何以咏麟趾騶虞箕子亦不宣復  
及於休徵也特不可藉是以獻媚於君耳自漢至唐五行之  
書不合宋史宗洪範者也故從之

接五行傳簡宗廟不禱祠廢祭祀逆天時則水不潤下又曰  
聽之不聰是謂不謀厥咎急厥罰恒寒厥極貧時則有鼓妖  
時則有豕禍時則有耳病時則有雷電霜雪雨雹黑眚黑祥  
惟火沴水宋史凡水潦河清醴泉大雪隕霜雨雹雷震魚孽  
蝗蝻豕禍黑眚水變水鬪昏霧日無光白虹龍蛇見馬異一  
產三男疾疫天鳴隕石皆屬之冰今削醴泉附日無光於天

文之日變餘從其例

水潦洪武元年六月江西新州蛟出江水入城高八尺人多溺死三年六月溧水縣江溢漂民居四年七月南寧府江溢壞城垣衢州府龍游縣大雨水漂民廬男女溺死五年八月嶼縣義烏餘杭山谷水湧人民溺死甚衆六年二月崇明縣爲潮所沒七月嘉定府龍游縣洋雅二江漲翼日南溪縣江漲俱漂公廨民居七年八月高密縣膠河溢傷禾八年七月淮安北平河南山東大水十二月直隸蘇州湖州嘉興松江常州太平寧國浙江杭州俱水九年京師大水百官乘船以朝七月湖廣山東大水十年六月永平灤漆二水沒民廬舍七月北平八府大水壞城垣十一年七月蘇松揚台四府海

溢人多溺死十二年五月青田山水沒縣治十三年十一月  
崇明潮決沙岬人畜多溺死是歲河南河決十五年七月河  
溢滎澤陽武十七年八月河決開封橫流數十里十月河南  
北平俱水十八年八月河南又水二十三年七月河南河決  
漂沒民居二十四年十月北平河間二府水二十五年正月  
河決陽武開封州縣十一俱水二十六年十一月青兗濟寧  
三府水二十七年三月寧陽汶河決二十八年八月德州大  
水壞城垣三十年八月河決開封三面皆水犯倉庫而止永  
樂元年三月京師雨水壞西南隅城五十餘丈五月章丘漯  
河決岬傷稼南海番禺潮溢八月安丘縣紅河決二年六月  
蘇松嘉湖四府俱水七月湖廣江西水九月河決開封壞滅

三年三月溫縣水決隄四十餘丈濟滂二水溢八月杭州屬  
縣多水滄男婦四百餘人七年五月安陸州江溢決渲馬難  
圩畔千六百餘丈六月壽州水決城是歲秦興江畔淪於江  
者三千九百餘丈八年五月平度州灘水及浮糠河決浸白  
十三所十二月汴河決壞城九年正月高郵覺社等九湖及  
天長諸水暴漲六月揚州屬州縣五江潮漲四日漂人畜甚  
衆八月漳衛二水決隄滄田九月雷州颶風暴雨淹遂溪海  
康壤田禾八百餘頃溺死千六百餘人十年七月盧溝水決  
環橋及隄畔溺死人畜保定縣決河畔五十四處十一月吳  
橋東光興濟交河天津決隄傷稼十二月安州雨水決直亭  
等河口八十九處十二年十月臨晉凍河逆流決姚暹渠堰

流入碯池滄沒民田將及鹽池崇明湖暴至漂廬舍五千八  
百餘家十三年六月北畿河南山東霪雨水溢壞廬舍沒田  
禾臨清尤甚淫漳二水漂磁州民舍十四年夏南昌諸府連  
月霪雨江漲壞民廬舍七月間封州縣十四河決隄岍永平  
灤漆二河溢壞民田禾福寧延平邵武廣信饒州衢州金華  
七府俱大雨溪水暴漲壞城垣屯堡十八年夏秋仁和海寧潮湧  
河代子河水溢浸沒城垣屯堡十八年夏秋仁和海寧潮湧  
填淪入海者千五百餘丈二十年五月廣東諸府潮溢溺死  
三百六十餘人夏秋霪雨河南北及鳳陽河溢州縣二十四  
二十一年五月峨眉驟雨溪水漲溺死百三十人二十二年  
七月黃巖潮溢溺死八百人洪熙元年六月通州武清固安

灤縣決河西務白浮宋家口堤嶰臨漳漳滏二河決堤嶰二  
十四丘定滹沱河大溢沒三州五縣田七月容城白溝河漲  
傷苗稼渾河決盧溝橋東狼窩口順天河間保定灤州俱水  
宣德元年六七月連雨黃汝二水溢滄開封十州縣及南陽  
汝州河南嵩縣江水大漲襄陽穀城均州鄖縣綠江民居漂  
沒者半三年五月邵陽武岡湘鄉暴風雨七晝夜山水驟長  
平地高六尺永寧衛大水壞城四百丈六月渾河水溢決盧  
溝河堤百餘丈七月北畿七府俱水六年六月渾河溢決徐  
家等口順天保定真定河間州縣二十九俱水七月河決開  
封八縣七年六月太原大雨河汾並溢傷稼八年六月江西  
霍雨瀕江八府江漲漂沒民田七月復連雨溺死男婦無算



九年正月沁鄉沁水漲決馬齒灣經獲嘉新鄉平地成河五月寧海縣潮決徙地百七十餘頃六月渾河決東畔自狼河口至小屯廠順天順德河間俱水七月遼東大雨水正統元年閏六月順天眞定保定濟南開封彰德六府俱大水二年鳳陽淮安揚州諸府徐和滁諸州河南開封四五月連雨河淮泛漲漂居民禾稼九月河決陽武原武滎澤湖廣沿江六縣大水決江堤三年陽武河決武陟沁決廣平順德漳決通州白河溢四年五月京師大水壞官舍民居三千三百九十區順天眞定保定三府州縣及開封衛輝彰德三府俱大雨水七月滹沱沁漳三水俱決壞饒陽獻縣衛輝彰德堤畔八月白溝潭河二水溢決保定安州堤蘇常鍾三府及江寧五

縣俱水溺死男婦甚衆九月滹池復決深州淤百餘里五年  
五月至七月江西四府淫雨江溢河南三府淫雨河溢八月  
潮決蕭山海塘六年五月泗州水溢丈餘漂廬舍七月水決  
武清灤縣堤二十二處八月寧夏久雨水泛壞屯堡墩臺甚  
衆八年六月渾河決固安八月台州松門海門海潮泛溢壞  
城郭官亭民舍軍器九年七月揚子江沙洲潮水溢漲高丈  
五六尺溺男女千餘人閏七月北畿七府及應天濟南岳州  
嘉興湖州台州俱大水河南山水灌衛河沒衛渾開封懷慶  
彰德民舍壞衛所城十年三月洪洞霖雨汾水陡決移置普  
潤驛以遠其害夏福建大雨水壞延平府衛城沒三縣田禾  
民舍人畜漂流無算河南州縣十四俱大水七月延安衛大

雨水壞護城河隄九月廣東徭所十三大雷水十月河決山  
東金龍口陽穀堤十一年六月渾河溢固安北畿三府南畿  
八府浙江三府河南二府俱連月大雨水是歲徐州南陽太  
原兗州武昌亦俱大水十二年春贛州臨江大雨水五月吉  
安江漲滄田十三年六月六名河決滄二百餘里壞廬舍二  
萬區死者千餘人河南濟南青兗東昌亦俱河決七月寧夏  
大水河決漢唐二壩河南八樹口決漫曹濮二州抵東昌壞  
沙灣等堤十四年四月吉安南昌臨江俱水壞寧廟廡舍景  
泰元年七月應天大水沒七縣民廬三年六月大雨浹旬河  
決沙灣白馬頭七十餘丈八月徐州濟寧間平地水高一丈  
民居盡圯南畿河南山東陝西俱大水四年春夏河連決沙

灣五年六月揚州大風雨潮決高郵寶應隄岍七月蘇松淮揚廬鳳六府大水八月東兗濟三府大雨水河漲滄田六年六月開封保定俱大水閏六月順天大雨水灤河泛溢壞城垣民舍河間永平水患尤甚武昌諸府江溢傷稼七年六月河決開封河南彰德川廬滄沒浙西夏雨三月北畿山東秋雨兩月俱大水天順元年夏淮安徐州懷慶衛輝俱大雨水河決三年六月穀城景陵襄水湧之傷稼四年夏湖北八府江漲滄沒麥禾北畿及開封汝寧大水五年七月河決開封上城築磚城禦之越三日磚城亦潰水深丈餘周王後宮及官民乘筏以避城中死者無算襄城水決城門溺死甚衆崇明嘉定崑山上海海潮衝決溺死萬二千五百餘人浙江亦

大水六年七月淮安大水潮溢溺死鹽丁千三百餘人七年  
七月密雲大雨山水驟漲軍器文卷房屋俱沒成化三年六  
月江夏水決江口隄岍迄漢陽長八百五十丈有奇五年湖  
廣大水山西汾水傷稼六年六月北畿五府大水七年夏山  
東浙江水九月大風雨山東七府及浙江杭嘉湖紹四府俱  
海溢滄田宅人畜無算九年六月畿南五府及懷慶俱大雨  
水八月山東大水十一年五月湖廣八府俱水十二年八月  
浙江風潮大雨水淮鳳揚徐亦俱大水十三年二月甲戌安  
慶大雪次日大雨江水暴漲閏二月河南大水九月淮水溢  
壞淮安州縣官舍民屋滄没人畜甚衆十四年四月襄陽江  
溢壞城郭五月陝州大水人多滄死七月北畿山東水九月

河決開封護城隄五十丈十八年七月昌平大水決居庸關  
水門四十九城垣舖樓墩臺一百二八月衛漳滹沱並溢自  
清平抵天津弘治二年五月河決開封黃沙岡抵紅船灣凡  
六處入沁河所經州縣多災省城尤甚七月順永河保四府  
州縣大水八月盧溝河堤壞七年七月蘇常鎮三府潮溢平  
地水五尺沿江者一丈民多溺死九年六月山陰蕭山大雨  
山崩水湧溺死三百餘人十四年五月貴池水漲蛟出滄死  
二百六十餘人歿邑十二皆大雨水七月廉州及靈山海漲  
滄死百五十餘人閏七月瓊山颶風潮溢平地水高七尺八  
月池寧安太四府大水蛟出漂流房屋十五年七月南京大  
風雨江水泛溢湖水入城五尺餘十七年六月廬山大風雨

平地水丈餘溺死星子德安民及漂沒廬舍甚衆正德元年六月陝西徽州大雨河溢漂沒居民孳畜二年六月固原驟雨河漲平地水高四尺人畜溺死三年九月延綏慶陽大水五年九月寧安太三府大水溺死二萬三千餘人十一月蘇松常三府水六年六月汜水暴漲溺死百七十六人毀城垣百七十餘堵十二年順天河開保定真定大雨水風陽蘇松常鎮嘉湖諸府皆大水淮安新舊城駕舟而行居民半栖城上荆襄江水亦大漲十五年五月江西大水嘉靖元年七月南京暴風雨江水湧溢郊社陵寢宮闕城垣吻春欄楯皆壞拔樹萬餘株江船漂沒甚衆廬鳳淮揚四府同日大風雨雹河水泛漲溺死人畜無算二年七月揚及徐州復大水夏秋

間山東州縣十二俱大水八月蘇松常鎮四府大水開封亦如之五年六月陝西五鄖壩雨水三丈餘衝決官舍徐沛河溢壞豐縣城十六年秋兩畿山東河南陝西浙江各被水災湖廣尤甚二十六年七月曹縣河決城池漂沒溺死者甚衆二十七年正月汧陽大水沒城隆慶元年夏京師大雨水六月新河鮎魚口驟雨沉運船數百艘二年七月台州颶風海潮大漲挾天台山諸水入城三日溺死三萬餘人沒田十五萬畝壞廬舍五萬區三年閏六月真定保定淮安濟南浙東西江南北俱大水七月河決沛縣自考城虞城曹單豐沛至徐州壞田廬無算九月淮水溢自清河至通濟閘及淮安城西淤三十里決二壩入海莒沂鄒城之水又溢出邳州溺人



民甚衆四年七月沙薛汶泗諸水驟溢決仲家淺等漕堤八月陝西大水河決邳州五年四月又決邳州自曲頭集至王家口新堤多壞萬曆元年七月荊州承天大水二年六月福建永定大水溺七百餘人是歲海鹽海大溢死者數千人三年四月淮徐大水五月淮水大決六月杭嘉寧紹四府海湧數丈沒戰船廬舍人畜不計其數八月淮揚鳳徐四府大水河決高郵礪山及邵家口曹家莊九月蘇松常鎮四府俱水四年正月高郵清水堤決九月河決豐沛曹單十一月淮黃交溢五年閏八月徐州河淤淮河南徙決高郵寶應諸湖堤六年六月清河水溢七年五月蘇松大水八月又水是歲浙江大水九年五月從化增城龍門溪壑泛漲田禾盡沒滄

死男婦無算七月福安淫雨洪水踏城漂沒廬舍殆盡八月  
泰興海門如臯狂風大雨塘圩坡壘盡決溺死者甚衆十年  
正月淮揚海漲浸豐利等鹽場三十渰死二千六百餘人七  
月蘇松六州縣大雨潮溢壞田禾十萬頃溺死者二萬人十  
一年四月承天大雨江水暴漲漂沒民廬人畜無算金州河  
溢沒城十四年五月江南北江西大水十五年五月浙江大  
水七月開封及陝州靈寶大雨河決是歲杭嘉湖三府應天  
太平霪雨江湖泛溢平地水深丈餘七月終颶風大作環數  
百里一望成湖十六年八月河決東光魏家口十七年六月  
浙江海沸杭嘉寧紹台屬縣靡宇多圯碎官民船及戰舸壓  
溺者二百人十九年六月蘇松大水溺人數萬七月寧紹蘇

松常五府濱海潮溢傷稼滄人九月泗州大水州治滄三尺  
淮水高於城祖陵被浸十月揚州風雨連日湖淮漲溢決邵  
伯堤五十餘丈高郵南北備俱衝二十一年五月邳州高郵  
寶應大雨水決湖堤二十二年七月鳳陽廬州大水二十三  
年四月泗水浸祖陵二十九年八月沔陽大水入城三十年  
六月京師大雨水三十一年五月成安永年肥鄉安州深澤  
漳溢沙燕河竝溢決堤橫流邴州靜海圯城垣廬舍殆盡六  
月泰安大水滄八百餘人八月泉州諸府大雨海水暴漲溺  
死萬餘人三十二年六月昌平大雨水壞各陵橋道七月永  
平真保三府俱水滄男婦無算八月河決蘇家莊滄豐沛黃  
水逆流灌濟寧魚臺單縣三十五年六月黃州蛟起武昌承

天耶陽岳州常德同時大雨漂沒廬舍徽州寧國太平嚴州  
四府山水大湧漂屬邑人口甚衆閏六月京師大雨長安街  
水深五尺四十一年六月通惠河決七月京師大水南畿江  
西河南俱大水八月山東廣西湖廣俱大水九月遼東大水  
四十二年浙西江西兩廣俱水四十六年八月潮州六縣海  
颶大作滄死萬二千五百餘人壞民居三萬間天啓三年睢  
寧河決六年七月河決匙頭灣倒入駱馬湖自新安鎮抵邳  
宿民居盡沒是歲順天永平二府大水邊垣多圯崇禎元年  
七月杭嘉紹三府大風雨潮溢壞民居數萬間溺數萬人海  
寧蕭山尤甚謂之海嘯三年山東大水四年六月又大水五  
年六月河決孟津口橫浸數百里七年五月邛眉諸州縣大

兩半月壞城垣田舍人畜無算十年八月敘州大水民登州堂及高阜者得免餘盡沒十三年五月浙江大水十五年六月汴水決九月河決開封朱家寨越數日決開封城

恒寒洪武十四年五月丁未建德雪六月己卯杭州晴日飛雪景泰四年鳳陽八衛二三月雨雪不止麥苗涸爛冬十一月戊辰至明年孟春山東河南浙江直隸淮徐大雪數尺淮東之海冰四十餘里人畜凍死萬計五年正月江南諸府大雪連四旬蘇常凍餓死者無算是春羅山大寒竹樹魚蚌皆死衡州雨雪連綿傷人甚多牛畜凍死三萬六千蹄天順四年三月乙酉大雨雪越月乃止成化四年三月南京大雪盈尺十三年四月壬戌開原大雨雪畜多凍死十六年七八月

越雋雨雪交作寒氣若冬弘治二年三月庚辰貴州安莊衛  
大雷雨雪雹壞麥苗六年十月南京雨雪連旬十一月鄖陽  
大雪至十二月壬戌夜雷電大作明日復震後五日雪止平  
地三尺餘人畜多死十七年二月壬寅鄖陽均州兩雪雹雪  
片大者六寸六月癸亥雨雪正德元年四月雲南武定隕霜  
殺麥寒如冬萬曆五年六月蘇松連雨寒如冬傷稼二十四  
年四月己亥林縣雪三十八年四月壬寅貴州暴雪形如土  
磚至夜方止民居片瓦無存者四十四年正月雨紅黃黑三  
色雪瓦屋多巨人跡四十六年四月辛亥陝西大雨雪驟麋  
駝凍死二千蹄崇禎六年正月辛亥大雨雪深二丈餘十一  
年五月戊寅喜峰口雪三尺

隕霜洪武二十六年四月丙申榆社隕霜損麥成化二年四月乙巳宣府隕霜殺青苗十九年三月辛酉陝西隕霜弘治八年四月庚申榆社陵川襄垣長子沁源隕霜殺麥豆桑辛酉慶陽諸府縣衛所三十五隕霜殺麥豆禾苗九年四月辛巳榆次隕霜殺禾是月武鄉亦隕霜正德八年四月乙巳文登萊陽隕霜殺稼丙辰殺穀十三年三月壬戌遼東隕霜禾苗皆死嘉靖二年三月甲子郟城隕霜殺麥辛未殺禾二十二年四月巳亥固原隕霜殺麥隆慶六年三月丁亥南宮隕霜殺麥萬曆二十六年十一月辛亥彰德隕霜不殺草崇禎十三年四月會寧隕霜殺稼十六年四月鄆陵隕霜殺麥

雨雹洪武二年六月庚寅慶陽大雨雹傷禾苗五年五月癸

丑夜中都皇城萬歲山雨冰雹大如彈丸八年四月臨洮平涼河州雨雹傷麥十四年七月巳西臨洮大雨雹傷稼永樂十二年四月河南一州八縣雨雹殺麥正統三年西延平慶臨鞏六府及秦河岷金四州自夏逮秋大雨雹四年五月壬戌京師大雨雹五年四月丁酉平涼諸府大雨雹傷人畜田禾六月壬申至丙子山西行都司及蔚州連日雨雹其深尺餘傷稼八月庚辰保定大雨雹深尺餘傷稼景泰五年六月庚寅易州大方等社雨雹如砲大傷稼自二十五里人馬多擊死六年閏六月乙巳東鹿雨雹如雞子擊死鳥雀狐兔無算天順元年六月巳亥雨雹大如雞卵至地經時不化奉天門東吻牌摧毀成化元年四月庚寅京師雨雹大如卵損



稼五月辛酉又大雨雹五年閏二月癸未瓊山雨雹大如斗  
八年七月丙午隴州雨雹大如鵝卵或如雞子中有如牛者  
五長七八寸厚三四寸六日乃消九年五月丁巳京師雨雹  
如拳十三年春湖廣大雨冰雹牛死無算十九年六月乙亥  
潞州雨雹大者如椀二十年二月丙子清遠雨雹大如拳丙  
戌大雷電復雨雹二十一年三月己丑夜番禺南海風雷大  
作飛雹交下壞民居萬餘死者千餘人二十二年三月甲寅  
南陽雨雹大如鵝卵弘治元年三月壬申夜融縣雨雹壞城  
樓垣及軍民屋舍死者四人二年三月戊寅賓州雨雹如雞  
子擊殺牧豎三人壞廬舍禾稼四月辛卯洮州衛雨冰雹水  
湧三丈四年三月癸卯裕汝二州雨雹大者如牆杵積厚二

三尺壞屋宇禾稼四月巳酉洮州衛雨雹及冰塊水高三四丈漫城郭漂房舍田苗人畜多泮死五年四月乙丑莒沂二州安丘鄒城二縣雨雹大如酒盃傷人畜禾稼六年八月巳巳長子雨雹大者如拳傷禾稼人有擊死者辛未京師雨雹大如彈丸平地壅積八年二月壬申永嘉暴風雨雨雹大如雞卵小如彈丸積地尺餘白霧四起毀屋殺黍禽鳥多死三月巳亥桐城雨雹深五尺殺二麥巳酉淮鳳州驟暴風雨雹殺麥四月乙亥常州泗邳雨雹深五寸殺麥及菜丙子沂州雨雹大者如盤小者如盃人畜多擊死六月乙卯京師雨雹七月乙酉洮州衛雨冰雹殺禾暴水至人畜多溺死者丙戌甘肅西寧大雨雹殺禾及畜九年五月丙辰京師雨雹十年

二月己卯江西新城雨冰雹民有凍死者三月丁卯北通州  
雨冰深一尺十三年八月戊子京師雨雹丙午又雨雹九月  
壬戌又雨雹十四年四月丁酉徐州清河桃源宿遷雨冰雹  
平地五寸夏麥盡爛五月乙亥登萊二府雨雹殺麥禾七月  
辛卯京師雨雹正德元年六月戊辰宣府馬營堡大雨雹深  
二尺禾稼盡傷三年四月辛未涇州雨雹大如雞卵壞廬舍  
菽麥四年五月甲午費縣大雨雹深一尺壞麥穀八年十月  
戊戌平陽太原沁汾諸屬邑大雨雹平地水深丈餘衝毀入  
畜廬舍十一年六月甲戌宣府大雨雹禾稼盡死九月丙申  
貴州大雨雹十二年五月己亥安肅大雨雹平地水深三尺  
傷禾民有擊死者十三年四月壬午衡州疾風迅雷雨雹大

如鵝子稜利如刀瓦屋碎斷樹木如剪嘉靖元年四月甲申雲南左衛各屬雨雹大如雞子禾苗房屋被傷者無算五月巳未蓬溪雨雹大如鵝子傷亦如之二年五月丁丑大同前衛雨雹四年四月丁未大同衛雨雹五月戊子固安雨雹五年五月甲辰滿城雨雹六月丁巳大同縣雨雹俱大如雞子丁卯萬全都司及宣府皆雨雹大者如甌深尺餘七月癸未南豐雨雹大如盃形如人面遂昌雨雹頃刻二尺大殺麻豆六年六月癸丑鎮番衛大雨雹殺傷三十餘人十四年三月辛巳漢中雷雹隕霜殺麥四月庚子開封彰德雨雹殺麥十八年五月壬辰慶都安肅河間雨冰雹大如拳平地五寸人有死傷者二十八年三月庚寅臨清大冰雹損房舍禾苗

六月丁卯延川雨雹如斗壞廬舍傷人畜三十四年五月庚子鳳陽大冰雹壞民田舍三十六年三月癸未沂州雨雹大如盂小如雞卵平地尺餘徑八十里人畜傷損無算四十三年閏二月甲申京師雨雹四月庚寅又雨雹隆慶元年七月辛巳紫荆關雨雹殺稼七十里三年三月辛未平溪衛雨雹平地水湧三尺漂沒廬舍四月己丑鄖陽縣雨雹平地水深二尺五月癸丑延綏口北馬營堡雨雹殺稼七十里四年四月辛酉宣府大同雨雹厚三尺餘大如卵禾苗盡傷五年四月戊午京師大雨雹六年八月乙丑祁定二州大雨雹傷禾菽斃三人萬曆元年五月辛巳京師雨雹四年四月丙午博興大雨雹如拳如卵明日又如之擊死男婦五十餘人牛馬

無算禾麥毀盡兗州相繼損禾五月乙巳定襄雨雹小如桃  
大如卵禾苗盡損九年八月庚子遼東定遼等徯雨雹如雞  
卵秋禾盡傷十一年閏二月丁卯秦州寶應雨雹如雞子殺  
飛鳥無算五月庚子京師大雨雹十三年五月乙酉宛平大  
雨雹傷人畜千計十五年五月癸巳喜峰口大雨雹如棗栗  
積尺餘田禾瓜果盡傷十九年四月壬子京師雨雹二十一  
年二月庚寅貴陽府大雨雹十月丙戌武進江陰大冰雹傷  
五穀二十三年五月乙酉臨邑雨雹盡作男女鳥獸形二十  
六年八月壬戌京師風雹二十八年六月山東大風雹擊死  
人畜傷禾苗河南亦雨冰雹傷三府九州縣禾麥三十年四  
月巳未京師大雨雹三十一年五月戊寅鳳陽皇陵雨雹七

月丁丑京師大雨雹三十四年七月丙戌又大雨雹平地水深三尺三十六年五月戊子京師雨雹四十一年七月丁卯宣府大雨雹殺禾稼四十六年三月庚辰長泰同安大雨雹如斗如拳擊傷城郭廬舍壓死者二百二十餘人十月壬午雲南雨雹天啓二年四月壬辰京師大雨雹崇禎三年九月辛丑京師大雨雹四年五月襄垣雨雹大如伏牛盈丈小如拳斃人畜甚衆七年四月壬戌常州鎮江雨雹傷麥八年七月己酉臨縣大冰雹三日積二尺餘大如鵝卵傷稼十年四月乙亥京師大雨雹閏四月癸丑武鄉沁源大雨雹最大者如象次如牛十一年六月甲寅宣府乾石河山場雨雹擊殺馬羸四十八匹九月京師雨雹十五年十月乙丑撫寧大雨

雹田禾盡死八月白水同官雒南隴西諸邑千里雨雹半日  
乃止損傷田禾十六年六月丁丑乾州雨雹大如牛小如斗  
毀傷牆屋擊斃人畜

雷震吳元年七月己丑雷震宮門獸吻得物若斧形石質洪  
武六年十一月戊申雷電交作十三年五月甲午雷震謹身  
殿六月丙寅雷震奉天門十月甲戌雷電十二月己巳廣州  
大風雨雷電十八年二月甲午雷電雨雪二十一年五月辛  
丑雷震元武門獸吻六月癸卯暴風雷震洪武門獸吻宣德  
九年六月甲子雷震大祀壇外西門獸吻正統八年五月戊  
寅雷震奉天殿鴟吻七月辛未雷震南京西角門樓獸吻是  
日大同巡警軍至沙溝風雷驟至裂膚斷指者二百餘人凡



年正月辛亥朔雷電大雨閏七月壬寅雷震奉先殿鴟吻十  
一年十二月壬寅京城大雨雷電翼日乃土十四年六月丙  
辰南京風雨雷電謹身殿災景泰三年六月庚寅雷擊宮庭  
中門傷人天順二年六月己卯雷震大祀殿鴟吻四年六月  
癸丑雷燬薊州倉殿四成化三年六月戊申雷震南京午門  
正樓五年二月乙卯又震山川壇具服殿之獸吻八年四月  
辛未始雷十二年十一月癸亥南京大雨雨十三年二月甲  
戌安慶大雪旣而雷電交作十一月辛未冬至杭州大雷雨  
戊寅荊門州大雷雷雨雪十七年七月己亥雷震郊壇承天  
門脊獸十一月丁酉江南大雷雨雪弘治元年五月丙子辰  
刻南京震雷壞洪武門獸吻己刻壞孝陵御道樹六月己酉

又壞鷹揚衛倉樓聚寶門旗杆二年四月庚子又毀神樂觀  
祖師殿三年七月壬子又壞午門西城牆六年閏五月丁未  
薊州大風雷拔木偃禾牛馬有震死者十二月壬戌南京雷  
雨拔孝陵樹七年六月癸酉如之八年十二月丙子長沙大  
雷電雨雪丁丑南昌彭水俱大雷電雨雪雹大木折十年四  
月雷震宣府西橫嶺之南山傾三十餘丈七月乙卯雷擊吉  
王府端禮門獸吻十二年四月丙午雷震楚府承運殿十四  
年閏七月庚辰福州大風雷擊壞教場旗杆城樓大樹正德  
元年五月壬辰雷震青州衣甲庫獸吻有火起庫中六月辛  
酉雷擊西中門柱脊暴風折郊壇松柏大祀殿及齋宮獸瓦  
多墮落者丙子南京暴風雨雷震孝陵白土岡樹十二月己

巳朔南通州雷再震四年十二月壬寅杭州大雨震電越二  
日復作五年六月丙申雷震萬全衛柴溝堡斃墩軍四人七  
年五月戊辰雷震餘干萬春寨旗竿狀如刀劈閏五月丁亥  
雷震成都衙門及教場旗竿丁年閏四月甲申薊州賺狗崖  
東墩及新開領關雷火震傷三十餘人十二年八月癸亥南  
京祭歷代帝王雷雨大作震死齋房吏十二月庚辰瑞州大  
雷電廿六年八月雷擊奉天門嘉靖二年五月丁丑雷擊觀  
象臺隆年七月己丑雷擊南京長安左門獸吻五年四月戊  
寅雷擊阜成門城樓南角獸吻及北九鋪旗竿十年六月丁  
巳雷擊德勝門破民屋柱斃者四人癸亥雷擊午門角樓及  
西華門城樓柱十五年六月甲申雷擊南京西上門獸吻震

死男婦十餘人十六年五月戊戌雷震謹身殿鴟吻二十八  
年六月丁酉朔雷震奉先殿左吻及東室門楣三十三年四  
月乙亥始雷三十八年六月丙寅雷擊奉先殿門外南西二  
牆隆慶元年八月大暑雷震次日太寒如嚴冬是夕雷震達  
且四年六月辛酉雷擊闕丘廣利門鴟吻萬曆三年六月己  
卯雷擊建極殿鴟吻壬辰雷擊端門鴟尾六年七月壬子雷  
擊南京承天門左簷十三年七月戊子雷震郊壇廣利門震  
傷榜題利字及齋宮北門獸吻十六年八月壬午雷震南京  
舊西安門鐘鼓樓獸吻十九年五月甲戌太平路喜峰路並  
雷擊城臺折傷官軍三十一年四月戊戌雷震孝陵大木二  
十二年七月壬辰雷擊祈穀壇東天門左吻二十四年二月

已酉夜鄆縣大雷雨火光遍十餘里三十二年五月癸酉雷  
燬長陵樓又燬薊鎮松棚路墩臺己丑又燬燕河路墩臺庚  
子雷燬南郊燈木三十七年八月甲寅雷劈西城上竿秦昌  
元年十月己未雷燬淮安城樓崇禎六年十二月丁亥大風  
雪雷電九年正月甲戌雷燬孝陵樹十年四月乙亥薊州雷  
火焚東山二十餘里十二年七月雷擊破密雲城舖樓牆七  
丈有奇所貯砲木皆碎十四年閏四月雷火起薊州西北焚  
及趙家谷延三十餘里六月雷震宣府西門城樓十五年四  
月四日雷震南京孝陵樹火從樹出十六年五月雷震通夕  
不止次日見太廟神主橫倒諸銅器爲火所鑠鎔而成灰乙  
酉雷震奉先殿鴟吻樞扇皆裂銅鏤盡燬

魚孽成化十一年五月海上魚數百折首順流而下嘉靖四  
十一年二月乙亥德州九龍廟雨魚大者數寸萬曆二十五  
年湖廣雨魚崇禎十年三月錢塘江木枋化爲魚有首尾未  
變者十三年德安雨魚

蝗蟲洪武五年六月濟南屬縣及青萊二府蝗七月徐州大  
同蝗六年七月北平河南山西山東蝗七年六月懷慶真定  
保定河間順德蝗八年夏北平真定大名彰德諸府屬縣蝗  
建文四年夏京師飛蝗蔽天旬餘不息永樂元年夏山西及  
開封蝗三年五月延安濟南蝗宣德四年六月順天州縣六  
蝗九年七月大名廣平鳳陽淮安東昌萊州青州濟南衛輝  
彰德懷慶開封州縣四十蝗螞蟻覆地尺許傷稼濟南登州淮

安平陽州縣十四俱蝗蝻生十年四月兩京山東河南蝗蝻  
傷稼正統二年四月北畿山東河南蝗五年夏順天河間真  
定順德廣平應天鳳陽淮安開封彰德兗州蝗六年夏順天  
保定真定河間順德廣平大名淮安鳳陽蝗秋彰德衛輝開  
封南陽懷慶太原濟南東昌青萊堯登諸府及遼東廣寧前  
屯屯二衛蝗生七年五月順天廣平大名河間鳳陽開封懷  
慶河南蝗八年夏南北兩畿蝗十二年夏保定淮安濟南開  
封河南彰德蝗秋永平鳳陽蝗十三年七月京師飛蝗蔽天  
十四年夏順天永平濟南青州蝗景泰五年六月寧國安慶  
濠州蝗七年五月順天河間保定真定順德大名廣平蝗蝻  
延蔓六月淮安揚州鳳陽大旱蝗九月應天及山西七府蝗

天順元年七月濟南杭州嘉興蝗二年四月濟南兗州青州  
蝗成化三年七月開封彰德衛輝蝗九年六月河間蝗七月  
真定蝗八月山東旱蝗十九年五月河南蝗二十二年三月  
平陽蝗四月河南蝗七月順天蝗弘治三年北畿蝗四年夏  
漣安揚州蝗六年六月飛蝗過京師自東南向西北日爲掩  
者三日嘉靖三年六月順天保定河間徐州蝗隆慶三年閏  
六月山東旱蝗萬曆四十三年七月又旱蝗四十四年四月  
復蝗七月常州鎮江淮安揚州蝗九月江寧廣德蝗竄大起  
禾黍竹樹俱盡四十五年北畿旱蝗四十六年畿南四府又  
蝗四十七年八月濟南東昌登州蝗天啓元年七月順天蝗  
五年六月濟南飛蝗蔽天田禾俱盡六年十月開封旱蝗崇



禎八年七月河南蝗十年六月出東河南蝗十一年六月兩  
京山東河南大旱蝗十三年兩京山東河南山西陝西大旱  
蝗

豕禍正統十五年七月有物墜帝前如豕首其色綠嘉靖七  
年杭州民家有豕肉膜間生字萬曆十五年四月普定衛生  
豕二首二尾八足二十三年春三河民家生八豕一類人形  
手足俱備額上一目三十八年四月燕河路營生豕一身二  
頭六蹄二尾六月大同後衛生豕兩頭四眼四耳四十七年  
六月黃縣生豕雙頭四耳一身八足七月寧遠生豕身白無  
毛長鼻象嘴天啓三年七月辰州翫坪溪生豕猪身人足一  
目四年三月神木生豕額多一鼻逆生深目藏皮肉合則不

見四月榆林生豕一首二身二尾八足六月霍州生豕二身  
二眼象鼻四耳四乳崇禎元年三月石泉生豕類象鼻下一  
目甚大身無毛皮肉皆白六年二月建昌生豕二身一首八  
蹄二尾十五年七月聊城生豕一首二尾七蹄

黑膏黑祥洪武十年正月丁酉金華處州雨水如墨汁占曰  
黑鬻露下天下冤明年按察使經歷王尙賢分守金處酷刑  
擾害死徙者五百家十四年正月黑氣亘天十一月黑氣亘  
天者再二十一年二月乙卯黑氣亘天宣德元年二月戊子  
北方黑氣東西亘天八月辛巳樂安城中有黑氣如死灰高  
輿亡徵也正統元年九月辛亥未刻黑氣亘天自西南屬東  
北二年八月甲申北方黑氣東西亘天十四年十一月乙丑

晡時西方有黑氣從地而生景泰元年二月壬寅黑氣南北  
亘天八月甲戌有黑雲如山化作龍虎麋鹿狀十月辛未西  
南黑氣如烟火南北亘天二年四月庚辰有黑氣如烟摩地  
而上三年正月癸亥黑雲起東南如人戴笠北向而揖天順  
五年七月己亥朔東方有黑氣須臾蔽天成化元年二月襄  
陽雨黑黍七年四月丙辰雨黑沙如漆八年三月庚子黑氣  
起西北臨清德州晝晦十二年七月庚戌京師黑管見民間  
男女露宿有物金睛脩尾狀如火狸負黑氣入牖直抵密室  
至則人昏迷徧城驚擾擽刃爇燈鳴金鼓逐之不可得帝常  
朝奉天門侍衛見之而譁帝欲起懷恩持帝衣頌之乃定其  
後汪直開西廠緝事道路以目黑管驗也十四年六月辛亥

隕黑石於臨晉二十一年閏四月壬辰開濮二州清豐金鄉  
未申時黑雲起西北化爲五色須臾晦如夜二十三年五月  
壬寅空中响如雷有氣墜東鹿得二黑石弘治五年二月巳  
巳北方黑氣東西亘天六年八月壬申南京有黑氣東西百  
餘丈十年二月丙申黑氣墜脩武化爲石聲如雷狀如羊首  
十四年四月辛未應州黑風大作十六年二月庚子宜良黑  
氣迷空咫尺莫辨人形正德七年六月壬戌黑眚見順德河  
間及涿州大者如犬小者如貓夜出傷人有至死者尋見於  
京師形赤黑風行有聲居民夜持刁斗相警達旦逾月乃息  
後又見於封丘十二年閏十二月丁丑夜瑞州有紅氣變白  
形如曲尺中外二黑氣相鬪者久之八年十月癸巳杭州雨

黑水三十七年三月衡州黑青見嘉靖四十三年六月黑虹  
見北方占曰兵象四十四年三月黑氛如木綿見西內思成  
宮帝心疑之諭輔臣徐階內火當慎占曰宮孽又曰有冤獄  
隆慶二年四月天雨黑豆六年四月杭州黑霧有物蜿蜒如  
車輪月光掣電冰雹隨之亦黑膏也萬曆二十四年十二月  
辛卯同安生黑毛二十五年二月癸亥湖州黑雨雜以黃沙  
崇禎十年山東雨黑水新鄉亦如之十一年京師有黑膏狀  
似狸入民家爲祟半歲乃止十三年正月丁卯黑氣彌空者  
三丈十六年帝將祭太廟兩簿已設黑氣自空墜如有白衣  
婦疾飛入宮軍人皆見之是年黑膏又見於京師宮中常遇  
之或如豕或如犬行其疾時作鬼聲

水變洪武五年河南黃河竭行人可涉永樂二年十月乙酉蒲城河津黃河清景泰五年正月戊午黃河自龍門至芮城清同一色天順二年十二月癸未武強苦井變爲甘弘治十四年八月丙辰融縣河水紅濁如黃河十月丙辰馬湖底濁江水白可鑑翌日濁如泔漿凝兩岸沙石上者如土粉十七日乃澄丁巳敘州東南二河白如雪濃如漿者三日十五年九月丙戌濮州井溢沙土隨水而出正德二年八月黃河清六年十二月自清河口至柳舖河清九十餘里者三日十年七月文安水忽僵立是日大寒結爲冰柱高圍俱五丈中空旁穴數日而賊至民避穴中生全者甚衆嘉靖六年十二月靈寶馮佐村黃河清五日隆慶六年五月南畿龍目井化爲

酒萬曆二十二年四月南京正陽門水赤三日二十五年八月蒲州池塘無風湧波者四日甲申臨淄濠水忽漲南北相向而鬪其地夏莊灣潮至聚散不恒聚則丈餘開則見底樂安小清河逆流臨清磚板二閘無風大浪三十年閏二月戊午河州蓮花寨黃河澗四十六年四月宣武正陽門外水赤三里如血一月乃止明年四月宣武門響崗至東御河水復赤泰昌元年八月庚申臨洮鞏昌間黃河清見底蘭州清者三日崇禎十年寧遠衛井鳴沸三日十年河南汝水變色深黑而味惡飲者多病十三年華陰渭水赤十四年山西潞水北流七晝夜勢如潮湧十五年達州井鳴濠水變血十六年松江自五月至七月不雨河水盡涸而泐水忽增數尺占曰

水自盈溢主兵興

恒陰正統五年七月大霧累日癸亥四方濃霧不辨人八年  
邳海二州陰霧彌月夏麥多損景泰六年正月癸酉濃霧四  
塞既而成霜附木八年正月甲子大霧咫尺不辨人物成化  
四年三月黃霧蔽天不見星日者累晝夜九年三月四日山  
東黑暗如夜二十年五月丙申番禺天晦良久乃復二十三  
年正月庚戌大霧不辨人弘治十五年十一月景東晝晦者  
七日十六年四月辛亥甘肅黑霧障天咫尺不辨人物十八  
年廣昌大霧三月死者相繼正德十年四月鉅野大霧六日  
殺穀嘉靖元年正月丁卯日正中京師黃霧四塞三年江北  
昏霧其氣中藥天啓六年六月丙戌霧重如雨閏六月己未



如之崇禎十七年正月朔大雨霧

虹霓洪武九年六月丁酉白虹見十四年八月癸亥夜白虹見三十年二月辛亥白虹見首尾指地良久沒正統十一年正月乙未日生背氣白虹彌天成化十三年十一月辛未冬至浙江大雷雨旣而虹見弘治二年正月甲戌日暈白虹彌天丙戌亦如之四年二月庚戌日交暈生兩珥白虹彌天十三年二月己亥白虹彌天十七年二月癸丑如之正德元年正月乙酉日暈白虹彌天嘉靖元年正月丙戌白虹彌天七年正月乙亥日重暈生珥白虹彌天十三年二月壬辰十二年壬午四十年十一月辛丑隆慶五年三月辛巳萬曆四十八年二月癸丑天啓元年閏二月甲午並如之

龍蛇之孽成化五年六月河決杏花營有卵浮於河大如人  
首下銳上圓質青白蓋龍卵也弘治九年六月庚辰宣府鎮  
南口墩驟雨火發龍起刀鞘內十八年五月辛卯日午旋風  
火起雲翳三殿若有人騎龍入雲者已而孝宗崩正德七年  
六月丁卯夜招遠有赤龍懸空光如火盤旋而上天鼓隨鳴  
十二年六月癸亥山陽見九黑龍一龍吸水聲聞數里攝舟  
及舟女至空而墜十三年五月癸丑常熟俞野村迅雷震電  
有白龍一黑龍二乘雲並下口中吐火目睛若炬撤去民居  
三百餘家吸二十餘舟於空中舟人墜地多怖死者是夜紅  
雨如注五日乃息十四年四月鄱陽湖蛟龍鬪嘉靖四十年  
五月癸酉青浦奈山九蛟並起湧水成河萬曆十四年七月

戊申舒城大雷雨起蛟百五十八跡如斧劈山崩田陷民溺  
死無算是歲建昌民樵於山逢巨蛇一角六足如雞距不噬  
不驚或言此肥蠃也十八年七月猗氏大水二龍鬪於村得  
遺卵尋失十九年六月己未公安大水有巨蛇如牛首赤身  
黑脩二丈餘所至隄潰二十一年七月霍丘霍山同日發蛟  
水高數丈三十一年五月戊戌歷城大雨二龍鬪水中山石  
皆飛平地水高十丈四十五年八月安丘青河村青白二龍  
鬪四十六年八月奉新等州縣蛟四出潢水橫流崇禎八在  
五月襄陽大雷雨城內外起蛟五

馬異永樂十八年九月諸城進龍馬民有牝馬牧於海濱一  
日雲霧晦冥有物蜿蜒與馬接產駒具龍文其色青蒼謂之

龍馬云宣德七年五月忻州民武煥家馬生一駒鹿耳牛尾  
玉面瓊蹄肉文被體如鱗七月滄州民畜官馬一產二駒州  
以爲祥獻於朝宣宗曰物理之常何足異也成化十七年六  
月興濟馬生二駒弘治元年二月景寧屏風山有異物成羣  
大如羊狀如白馬數以萬計首尾相啣迤邐騰空而去嘉靖  
四十二年四月海鹽有海馬萬數沿岸行二十餘里其一最  
巨高如樓

人痾洪武二十四年八月河南龍門婦司牡丹死三年借袁  
馬頭之屍復生宣德元年五月昌黎民楊東成妻李氏一產  
二男一女舊史志一產三男近世如此者甚衆無歲不有不  
勝詳也其稍異者志之十一月行在錦衣衛校尉蔡榮妻皮

氏一產四子五年八月湖廣平茶千戶所軍朱海妻劉氏一  
產二男一女十年八月忠義前衛軍張小二妻邢氏一產一  
男二女天順四年四月揚州民婦一產五男成化十三年二  
月南京鷹衛軍陳僧兒妻朱氏一產三男一女十七年六月  
宿州民張珍妻王氏臍下右側裂生一子二十年十二月徐  
州婦人肋下生癩久之漸大兒從癩出二十一年嘉善民鄒  
亮妻初乳生三子再乳生四子三乳生六子弘治十一年六  
月騰驤左衛百戶黃盛妻宜氏一產三男一女十五年五月  
永清左衛軍匠王海妻一產一男二女十六年五月應山民  
張本華妻崔氏生鬚長三寸是時鄭陽商婦生鬚三綵約百  
餘莖嘉靖二年六月曲靖衛舍人胡晟妻生一男兩頭四手

三足四年橫涇農孔方脇下產肉塊剖視之一兒宛然五年  
有生子者六目四面有角手足各一節獨爪鬼聲十一年當  
塗民吳倫妻一產三男一女十二年貴州安衛軍李華妻生  
男兩頭四手四足二十七年七月大同右衛參將馬繼舍人  
馬錄女年十七化爲男子隆慶二年十二月靜樂男子李良  
兩化爲婦人五年二月唐山民婦生兒從左脇出萬曆十年  
浙川人化爲狼十八年南宿州民婦一產七子膚髮紅白黑  
青各色三十七年六月繁峙民李宜妻牛氏一產二女頭面  
相連手足各分四十六年廣寧衛民婦產一猴二角四齒是  
時大同民婦一產四男崇禎八年夏鎮江民婦產一子項戴  
兩首髻鬢一首與母俱斃十五年十一月曹縣民婦產兒兩

頭頂上有眼角手過膝

疾疫永樂六年正月江西建昌撫州福建建寧邵武自去年至是月疫死者七萬八千四百餘人八年登州寧海諸州縣自正月至六月疫死者六千餘人節武比歲大疫至是年冬死絕者萬二千戶九年七月陝西疫十年六月湖州三縣疫七月寧波五縣疫正統九年冬紹興寧波台州瘟疫大作及明年死者二萬餘人景泰四年冬建昌武昌漢陽疫六年四月西安平涼疫七年五月桂林疫死者二萬餘人天順五年四月陝西疫成化十一年八月福建大疫延及江西死者無算正德元年六月湖廣平溪清涼鎮遠偏橋四衛大疫死者甚衆靖州諸處自七月至十二月大疫建寧邵武自八月

始亦大疫十二年十月泉州大疫嘉靖元年二月陝西大疫  
二年七月南京大疫軍民死者甚衆四年九月山東疫死者  
四千一百二十八人三十三年四月都城內外大疫四十四  
年正月京師饑且疫萬曆十年四月京師疫十五年五月又  
疫十六年五月山東陝西山西浙江俱大旱疫崇禎十六年  
京師大疫自二月至九月止十七年春北畿山東疫

鼓妖洪武五年八月巳酉徐溝西北空中有聲如雷十一年  
瑞昌有大聲如鐘自天而下無形二十一年八月甲子天鳴  
自壬戌至是日晝夜不止二十八年三月戊午昏刻西南天  
鳴如風水相搏轉西北至一鼓止終明代天鳴天鼓鳴者凡  
二百識其甚者而已宣德元年八月戊辰東南天鳴如雨墮



迭至辛未東南天鳴聲如萬鼓正統七年十一月己未東南  
天鳴如瀉水十年三月庚寅西北方天鳴如鳥羣飛天順六  
年九月乙巳夜天無雲西北方有聲如雷七年二月晦夜空  
中有聲大學士李賢奏無形有聲謂之鼓妖上不恤民則有  
此異成化十二年十二月辛卯臨汾天鼓鳴其聲如砲十三  
年正月甲子代州無雲而雷十四年八月戊戌早朝東班官  
若聞有甲兵聲者辟易不成列久之始定十九年二月甲申  
永寧天鳴如雷聲振林谷禽獸飛走人民驚懼弘治四年十  
一月甲戌有星隕真定紅光燭天俄天鳴如鼓又如奔車六  
年六月丁卯石州吳城驛無雲而震者再十七年六月甲申  
江西廬山鳴如雷嘉靖十四年正月滁州大柳諸山夜鳴二

十九年二月甲子隆慶州張山營堡山鳴萬曆十二年十二月巳未蕭縣山鳴如驚濤澎湃竟夜不止二十八年八月戊戌西北方有聲如雷三十三年八月揚州鎮江天鳴如潮怒起者六日三十六年八月庚辰南京東南天鳴昏刻西南亦鳴自後常鳴至九月丙戌乃止三十七年九月庚辰又鳴如風鐸如濤者累日天啓七年八月丁巳莊烈卽位朝時空中有聲如天鼓發於殿西此鼓妖也崇禎七年十月蕭縣北山鳴十年鍾山鳴聲如虎嘯三月會稽山石言聲如鐘十二年十二月乙未蕭縣山鳴是月西山大鳴如雷如風濤十三年二月壬子浙江省城門夜鳴十五年黃州城南門哭五晝夜十六年冬建極點鳴中有聲似鶴鳴曰苦若其聲漸大復

三日夜不止十七年三月辛丑孝陵夜哭亦鼓妖

石成化六年六月壬申陽信雷聲如嘯隕石一碎爲三外  
黑內青十四年六月辛亥臨晉天鳴隕石縣東南三十里入  
地三尺大如升色黑二十三年五月壬寅東鹿空中響如雷  
青氣墜地掘之得黑石二一如椀一如雞卵弘治三年三月  
慶陽雨石無數大者如鵝鴨卵小者如芡實皆能人言說人  
短長四年十月丁巳光山有紅光如電自西南往東北聲如  
鼓久之入地化爲石大如斗十年二月丙申脩武黑氣入地  
化爲石十二年五月戊寅朔州有聲如迅雷白氣騰上隕大  
石三正德元年八月壬戌夜有火光落卽墨化爲綠石圓高

尺餘九年五月  
天鼓鳴隕石十三年正月己未鄰  
水隕石一嘉靖  
天鼓鳴火流墜地爲  
石四十二年三月癸卯懷慶  
天鼓鳴火許隆慶  
年三月己未保定新城隕黑石  
流星晝隕景州城北化爲黑石  
鳴黑烟騰起隕石演武廳畔十九年四月  
隕石二十四年正月丁丑易州及紫荆關天鼓鳴源泉有  
光化石崩裂四十五年八月武城雨異物三塊聲如雷崇禎  
二年九月丁未太康隕石

明史藝

志第四終

明史彙

卷之九

光祿大夫

經筵講官明史總裁戶部尚書加七級

王鴻緒奉

敕編撰

五行二

火 木

按五行傳棄法律逐功臣殺太子以妾爲妻則火不炎上又曰視之不明是謂不哲厥咎豫厥罰恒煥厥疾時則有草妖時則有羽蟲之孽時則有羊禍時則有且癘時則有赤青赤祥惟水沴火宋史以火燔常煥草異瑞木羽蟲之孽羊禍赤青赤祥火異等皆屬之火今削瑞禾及草異中嘉瓜靈芝之屬餘從其例

火燔洪武元年七月丁酉京師火延燒永濟倉二年二月己

巳大河衛火燔及廣積庫七月乙未寶源局火甲子鳳臺門  
軍營火延燒武德衛軍器局四年十一月癸亥京師大軍倉  
災五年二月癸未臨濠府火壬辰至甲午京師火熾龍驤等  
六衛軍民廬舍七月丁卯永清衛軍器庫火十二月丙戌京  
師定遠等衛火焚及軍器局兵仗十七年十二月己未潮州  
火官廨民居及倉廩兵仗圖書焚蕩無遺二十一年二月戊  
辰歷代帝王廟火上元縣治亦災甲戌天界能仁二寺災二  
十九年二月辛丑通州火燔屋千九百餘三十年四月甲午  
廣南衛火延燒城樓及衛治倉庫永樂十九年四月庚子奉  
天謹身華蓋三殿災二十年十二月戊寅乾清宮災宣德三  
年三月己亥東嶽泰山廟火六年八月武昌火延燒楚王後

倉廩九年二月庚午京城東南樓火正統二年二月西鎮吳山廟火三年八月辛酉順天貢院火席舍多焚改期再試十二月乙亥韓府承運殿災三月戊午代府寢殿火六年十一月安定門火七年正月廣昌木廠火焚松木八千八百餘株戊午南京內府火燔廊房六十餘間圖籍器用守衛衣甲皆空三月辛未趙城媯皇寢廟火十年正月忠義前後二衛災是時太倉屢火遣尚書王佐侍郎姜濤祭火龍及太歲以禳之五月甲申忠義後衛倉復火癸巳通州右衛倉火十一月丁酉御花房火十一年秋武昌火死者數百人十二月乙未周府災十二年六月南京山川壇災殿廡俱燬十三年二月

癸酉忠義前衛倉火十四年六月丙辰夜南京謹身奉天華蓋三殿災景泰二年六月丙子青州廢齊府火三年八月戊寅秦王府火五年春南京火延燒數千家七年九月壬申寧王府火延燒八百餘家天順元年七月丙寅夜承天門災二年五月戊子器皿燬火三年九月庚寅肅州城中火延燒五千四百餘家死者六十餘人四年六月癸丑大雷火燬薊州倉廩八月己巳光祿寺大烹內門火是歲楚府頻火宮殿家廟悉燬五年三月丁卯南京朝天宮災六年二月藥庫火六月癸未楚府火七年正月丁酉南京西安門木廠火延燒皇牆二月戊辰會試天下舉人火作於貢院御史焦顯扃其門燒殺舉子九十餘人成化二年九月癸未南京御用監火六



年十一月己亥江浦火延燒二百六十餘家九年七月東直門災十一年四月壬辰夜乾清宮門災十三年十一月壬辰太倉米麥歲久蒸滯自焚百餘石十八年八月丙午合州火延燒千五百餘家乙卯楚府火几三發十一月戊午南京國子監火十二月乙卯器皿廠火壬辰寧河王府火先有妖夜見或爲神或爲王侯時舉火作欲焚狀是夜燔府第無遺冠服器用皆盡二十年正月戊戌欽天監火五月山西都司經歷司火公廡庫藏幾盡二十二年六月臨海災延燒千七百餘家弘治元年三月庚寅南京內花園火十一月丁丑夜南京甲字庫災二年四月乙未南京神樂觀火四年二月戊午禮部官舍火六年四月甲寅刑部官舍火辛酉夜南京舊內

災七年七月丙辰福州雷火焚城樓八年三月戊子鎮東等  
堡躍火星如斗燬公館倉廩人馬多斃十年三月神樂觀火  
十一年六月貴州大火燬官民房舍千八百餘所死傷者六  
千餘人十月甲戌夜清寧宮災十二年六月甲辰夜闕里聖  
廟災十二月建陽書院火古今書板皆燼十三年二月乙酉  
禮部官舍火七月甲寅南城縣空中有火乍分乍合流光下  
墜十餘丈隱隱有聲燬軍民廬舍庚申永寧衛雁尾山至居  
庸關之石縱山東西四十餘里南北七十餘里延燒七晝夜  
閏七月辛巳福州城樓燬八月己未濟府火十一月庚辰寧  
河王府火十六年三月庚午遼東鐵嶺衛火如斗丙子火  
三燒房屋二千五百餘間死者百餘人四月戊午寬河衛倉

災燬米豆四萬餘石九月戊寅廣寧衛城火燔三百餘家十七年四月丁巳淮安火焚五百餘家五月癸巳正陽門內西廊火燔武功坊正德元年二月鄖陽火燬譙樓官舍延百餘家是歲寧夏左屯衛紅氣亘天旣而火作城樓臺堡俱盡六月庚寅大同平虜城災燔藁百萬餘八月南京火焚數百家十一月己亥臨海縣治火延燒數千家六年四月光化大火民居存者無幾十一月江西永平關火燔六百餘家七年三月己未懷縣有火如斗自空而墮大風隨之燬官民房千餘間火逸城外延及丘木庚申成山衛秦皇廟火屋宇悉燬像設如故是月文登大桑樹火樹燔而枝葉無損五月癸酉至閏五月丙子遼東懿路城火三作焚官民廬舍之半九月壬

午玉山火燔學舍及民居三百餘家八年六月辛酉豐城縣西南連隕火星如盆如斗既而火作至七月初始熄燔二萬餘家七月戊子火隕龍泉縣焚四千餘家十月壬寅饒州及永豐浮梁火各燔五百餘家浮梁學舍災庚申臨江火燔官舍延八百餘家九年正月庚辰乾清宮火十一年八月黔陽火燬城樓官廨延七百餘家十二年正月甲辰清寧宮小房火四月裕陵神宮監火八月丁卯南昌火燔三百家九月壬午建安火燔二百五十餘家十三年二月己卯夷陵火燔七百餘家八月庚辰獻陵明樓災丁酉延平火燔五百餘家十四年四月乙巳淮安新城火七月泰寧火燔五千餘家十五年五月辛卯靜樂火燔八百餘家嘉靖元年正月己未清寧

宮後三小宮災楊廷和言廢禮之應不報二月己丑南京針線廠火己亥通州城樓火二年五月丙子榮王府火九月戊辰秦府宮殿火四年三月壬午夜仁壽宮災玉德安喜景福諸殿俱燼五年三月乙酉趙王家廟火六年三月丁亥西庫火八年十月癸未乾清宮內災十年正月辛亥大內東偏火四月庚辰兵工二部公廨災燬文籍十三年六月甲子南京太廟火燬前後殿東西廡神廚庫十五年四月癸卯山西平虜衛火盡燬神機官庫軍器十八年二月乙丑趙州及臨洛鎮行宮俱火丁卯駕幸磁州行宮四更火陸炳負帝出後宮及內侍有殞於火者六月丁酉皇城北鼓樓災二十年四月辛酉夜宗廟災燬成仁二廟主二十五年五月壬申盛甲廠

火二十六年十一月宮中火釋楊爵於獄三十一年八月乙丑南京試院火三十五年九月戊辰杭州大火延燒數千家三十六年四月丙申奉天華蓋護身三殿文武二樓午門奉天門俱災三十七年正月光祿寺災三十八年正月癸未前軍都督府火四十年十一月辛亥夜萬壽宮災四十四年三月乙亥夜大明門內西千步廊火四十五年江西鐵柱宮有緋衣人乘雲下坐於宮上者數日旣而火發宮爲燼隆慶二年正月浙江省城外災燬室廬舟艦以千計四月承運庫火累朝寶器皆燼五年二月壬子南京廣惠二倉火六年遼東鐵嶺等八城火燬官舍三千七百餘萬曆元年十一月己亥慈寧宮後舍火三年四月甲戌工部後廠火五年十月丙申

禁中火十一月癸未宗人府災十一年十二月庚午夜慈寧宮災十二年二月巳酉無逸殿災十二月癸卯荆文殿十五年五月甲子司設監火十八年三月辛酉遼東塞山兒堡火燬城堡器械傷九十餘人十九年十二月甲辰萬法寶殿災二十一年六月望太倉公署後樓有砲聲火藥器械俱燼二十二年五月壬寅天火燔鐵嶺禱十餘家六月西華門災七月有星墜渤海所南門樓上火發樓燼二十四年二月甲寅潞府門火三月乙亥火發坤寧宮延及乾清宮俱燼二十五年二月壬午杭州火燒官民房千三百餘間丙戌馬湖屏山災燔八百餘家三月癸卯泗州大火燒民房四千餘盱眙火燔民房百餘六月戊寅三殿災火起歸極門延皇極等殿文

昭武成二閣周遭廊房一時俱燼二十六年十月喜峰大風  
雪西北樓火聲振地旗竿剖折火藥火箭俱焚十二月甲寅  
吏部文選司署火二十七年十一月壬申內府火延燒尙寶  
司印綬監工部廊至銀作局山牆而止二十八年三月南陽  
火延燒唐王宮二十九年正月己巳鐵嶺衛火車輔火藥俱  
盡八月己卯大光明東配殿災三十年二月乙酉魏國公賜  
第火十月丙申孝陵災十二月庚子南海普陀山寺災三十  
一年九月戊寅通州漕艘火三十三年二月乙丑御馬監火  
五月辛巳洗白廠火九月甲申昭和殿火丙申官軍於盛甲  
廠支火藥藥年久凝如石用斧劈之火突發聲若震霆乃鎗  
火箭迸射百步外軍民死者無數十一月丁卯刑部提牢廳



火三十五年二月乙卯易州神器庫火四月丁酉通州西倉  
火十月巳卯南京行人司署燬三十七年正月庚子慶王府  
火燔寢宮及帑藏三月丙戌武昌火越二日又火共燔二百  
六十餘家六月慶王府災十月戊午朝日壇火三十八年四  
月丁丑夜正陽門箭樓火三十九年四月戊子怡神殿災四  
十一年五月壬戌蜀王府災門殿爲燼四十三年四月壬午  
黃花鎮柳溝火延燒數十里甲午蜀府殿庭災遼東長寧堡  
自二月至五月火發凡五燬房屋人畜無算閏八月辛亥通  
州糧艘火九月丁丑湖口稅解燬四十四年十一月巳巳隆  
德殿災丁亥南城延喜宮災四十五年正月壬午東朝房火  
延燬公生門四十六年閏四月丁丑夜開原殷家庄堡臺杆

八同時燼甲申煖閣廠膳房火九月壬子茂陵火十月梧州  
火官舍民居多燬四十七年四月癸酉盛甲廠火秦昌元年  
十月丁卯熾鸞宮災天啓元年閏二月丙戌昭和殿災三月  
甲辰杭州火延燒六千餘家七月戊子復災城內外延燬萬  
餘家二年五月丙申旗纛廟正殿災火藥盡焚匠役多死者  
三年七月辛卯南京大內左傍宮災六年五月戊申王恭廠  
災地中霹靂聲不絕火藥自焚烟塵障空白晝晦冥凡四五  
里五月癸亥朝天宮災七月庚寅登州城樓火七年十月庚  
子寧遠前屯火傷男婦二百餘人崇禎元年四月乙卯左軍  
都督府災五月乙亥尚膳監薦坊司火丁亥丁字庫火七月  
己卯公安縣火燬文廟延五千餘家二年十一月庚子火藥

局災三年三月戊戌又災八月癸酉頭道關災火器轟擊無  
餘六年正月癸丑濟南舜廟災七年九月庚申盛甲廠災十  
一年八月丁酉火藥局災

恒煥洪熙元年正月癸未以京師過冬不雪詔諭修省正統  
九年冬畿內外無雪十二年冬陝西無雪景泰六年冬無雪  
天順元年冬宮中所雪是年直隸山西河南山東皆無雪二  
年冬命百官祈雪六年冬直隸山東河南府十衛二皆無雪  
成化元年冬無雪五年冬煥如夏六年二月壬申以自冬徂  
春雨雪不降勅諭羣臣親詣山川壇請禱十年二月南京山  
東奏冬春恒煥無冰雪十一年冬以無雪而禱卒不得十五  
年冬直隸山東河南山西並不見雪十九年冬京師無雪直

隸六府如之弘治九年冬恒燠無雪十五年冬無雪十八年冬溫如春歷久無雪正德元年冬無雪永嘉自冬至春麥穗桃李實三年冬無雪六年至九年連歲無雪十一年冬無雪嘉靖十四年冬深無雪遣尚書夏言等徧祭諸神十九年冬無雪二十年十二月癸卯禱於神祇壇二十四年十二月甲午命諸臣分告宮廟以祈雪也三十二年冬無雪三十三年十二月壬申以災異屢見卽禱雪日爲始百官青衣辦事三十六年冬無雪三十九年冬無雪明年又無雪帝將躬禱會大風命亟禱雪兼禳風變四十一年至四十五年言冬無雪者殆無虛歲隆慶元年冬無雪四年冬無雪萬曆四年十二月巳丑命禮部祈雪十六年十七年二十九年三十七年四

十七年亦如之崇禎五年十二月癸酉命順天府祈雪六年  
七年冬無雪

草異永樂十六年正月乙丑同州澄城郃陽朝邑雨穀及蕎  
麥正統八年十一月殿上生荆棘高二尺十四年廣州獄竹  
牀踰年忽青生葉成化元年二月雨暴黍於襄陽六年二月  
戊寅湖廣應山雨粟弘治八年二月枯竹開花實如麥米苦  
蕒開蓮花六月甲子黥縣雨黑白豆味不可食九年黃州民  
家瓜大如斗瓢皆赤血嘉靖四十四年六月睿宗原廟前東  
柱產金芝隆慶二年天雨黑豆萬曆四十三年四月戊寅石  
首雨豆大小不一色雜紅黑崇禎四年五年河南草生人馬  
形如被甲持矛馳驅戰鬪者然六年崇仁宜黃樂安雨黑粟

如蕎麥可食七年黃梅縣雨黑子如粟孟縣民孫光顯祖墓  
葡萄抽條萬狀如貴官美人龍鳳龜麟魚蛇孔雀鸚鵡道臣  
曹應秋得美人三鳳一鸚鵡一美人黃衣白裳面施粉黛鳳  
羽五采鸚鵡棲於架架有蓋蓋中有粒點染生動繪畫不及  
也其連陌王氏黨氏塋所產皆同十三年徐州田中白豆悉  
作人而眉目宛然

羽孽洪武十一年元旦早朝有鴟自天墮死於丹墀萬曆十  
二年廣濟龍江鎮民家有鴨大聲呼云算賬殺而烹之二十  
五年二月壬午岳州民家有鴨含絮裹火飛上屋入竹椽茅  
茨中火四起至三月乙未方熄延燒數百家四十二年四月  
壬午雙鶴啣火飛集掖縣海神廟殿明日廟火崇禎六年汝

寧有鳥鳩身猴足鳳陽惡鳥數萬兔頭雞身鼠足僕僕甚肥  
犯其骨立死

羊禍萬曆三十八年四月焯縣民家羊產羔一首二眼四耳  
二尾八足身若割分四十八年雲南省城產羊妖

赤霄赤祥成化十三年二月甲午浙江山陰湧泉如血正德  
元年正月乙酉夜崇明空中有紅光曳尾如虹起東北至西  
南沒聲如雷辛丑鳳陽紅光發與日同色聲如雷二年八月  
己亥赤光見寧夏長五丈八年七月甲申龍泉有赤彈二自  
空墮於縣治形如鵝卵躍入民居相鬪久之嘉靖六年南京  
涌血三十三年四月戊子慈谿民家湧血高尺餘三十七年  
五月戊辰東陽民張思齊家地裂五六處出血如線高尺許

血癸犬就食之掘地無所見三十九年二月己未竹溪民家  
出血隆慶六年閏二月癸酉遼東赤風揚塵蔽天萬曆六年  
七月丁丑松門衛金鐺家湧血三尺有聲十三年四月乙丑  
虹民王祿投宿姚壘家見血出於地驚走至市市亦流血鄉  
人擊器物謀之乃止十九年六月庚戌慈谿茅家浦湧血八  
處大如盆高尺許血濺船船卽出血濺人足足亦出血數刻  
乃絕二十六年九月甲辰蕭山賈九經家出血高尺許天啓  
元年六月庚寅肇慶民王體積中庭噴血如跑突泉崇禎七  
年二月戊午海豐雨血八年八月戊寅宣城池中出血十二  
年黃州城南門流血五日十五年劔州民數萬戶家家有血  
汚其門



火異成化二十一年正月甲申朔有火光自中天而少西墜於下化爲白氣復曲折上騰聲如雷弘治元年五月清寧宮後夜有火如斗自下而上者再三年三月庚午儀隴空中有紅白火燄長三丈餘自縣治東北流至正東六十餘里而墜聲震如雷十年四月辛丑阜平有火光長八九尺大如輻軸有聲自東南至西南而墜正德元年三月戊申夜太原有火如斗大墜寧化王殿前七月壬戌夜火光墜卽黑民家化爲綠石員高尺餘七年三月夜大風雷電餘干仙居寨有光如箭墜旗竿上俄如燭龍光照四野士卒撼其旗飛上竿首旣而其火四散鎗首皆有光如星十二年五月己亥夜火墜都察院獄旋轉久之始滅十五年六月癸未夜台州火墜三大

如盤觸草木皆焦嘉靖五年七月甲申有火毬三大五六尺從北墜於東其光燭天二十年七月丙戌火毬如斗墜左軍都督府中門東良久乃滅萬曆四年十一月甲午夜火墜星隕質明費城西北地色如硃卽其所墜也長二里濶一二尺十四年保定府民間牆壁內出火三日夜乃熄二十年三月陝西空中有火如盆後生三尾墜於西北二十一年二月二十五日夜分大毛山樓上各獸吻俱有火如雞卵赤色卽時雨雪火上嗟嗟有聲二十三年九月二十四日夜永寧有火光形如屋大墜於西北永昌鎮番寧遠所見同二十四年二月十一日夜鄯縣雷雨徧地火光十有餘里二十五年二月癸卯平涼瓦獸口出火水灌不滅八月甲申肅涼二州火光

九天形如車輪尾分三股約長三丈二十八年在月真寧阻  
火形如礫磚長三尺餘光焰四照逾二時墜地燄烈八年泰  
安嶽廟神口噴火天啓六年五月朔厚載門火廟紅煙滾  
出前門城樓角有數千螢火并合如車輪崇禎元年西安有  
火如礫如斗者數十色青燄高尺許嘗入民居留數日乃去  
用羊豕禳之不爲害自五月至七月而止九年泰山神廟神  
口吐火十三年六月壬申鎮安火光如斛自西墜地土木皆  
焦

按五行傳田獵不宿飲食不享出入不節奪農時及有姦謀  
則木不曲直又曰貌之不恭是謂不肅厥咎狂厥罰恒雨厥  
極惡時則有下體生上之病時則有青青青祥惟金沴木宋

史以木妖木冰狂人霖雨甘露服妖龜孽雞禍鼠孽青皆青祥皆屬之木今削其露餘從其例

木妖弘治八年三月辛卯廣寧右衛臺杆火高五寸杆如故是年長沙楓生李實黃連生黃瓜九年三月長寧楠生蓮花李生豆莢正德元年三月廣寧墩臺火發旂杆凡六嘉靖三十七年十月戊辰五湖有大杉木圍丈五尺長六丈餘湧出泗水沙中隆慶二年正月初八日保寧堡城角旂杆火灼灼有聲五年四月杭州粟生桃萬曆中堡鎮墩臺旂杆出火不一而足其尤異者十五年二月綏靖邊城各堡春獸旂杆俱出火軍士杖撲之杖亦生火三更乃息十七八年遼東鐵嶺皆同五月丁卯祖陵大松樹孔中吐火竟日方滅二十三年

十二月癸亥皇陵樹顛火出延燒草木天啓六年四月癸巳  
白露著樹如垂綿日中不散十月辛酉南京西華門內有燔  
無火禮臣往視乃舊宮材木瘞土中久烟自生土石皆焦以  
水沃之三日始滅崇禎六年五月癸巳霍山縣有木飢飛墮  
不知所自來七年二月丁巳太康門牡自開者三知縣集邑  
紳議其事梁墮而死

木冰洪武四年正月戊申木冰六年十二月乙丑雨木冰十  
一年正月丁亥雨木冰二十二年正月甲戌雨木冰正統三  
年十月丁丑曉木介至辰漸消天順七年十月甲辰雨木冰  
八年正月乙丑雨木冰成化十六年正月辛卯曉雨木冰二  
十三年十二月戊辰曉木介隆慶三年十一月癸巳木冰萬

曆十四年冬蘇松木冰崇禎元年十一月陝西木冰樹枝盡折其後大河以北歲有此異

狂人景泰三年五月癸巳朔以明日立太子具香亭於奉天門有一人自外竟入執紅棍擊香亭曰先打東方甲乙木嘉靖十八年駕將南幸有軍人孫堂從御路中橋至奉天門下登金臺坐久守門官役無知者升堂大呼覺而捕之乃病狂者

恒雨洪武十三年七月海康大雨壞縣治二十三年十一月山東二十九州縣久雨傷麥泰建文元年三月乙卯夜燕王營於蘇家橋大雨平地水三尺及王臥榻永樂元年七月建寧衛霖雨壞城二年七月新玄衛霖雨壞城八月霖雨壞城北

京城五千餘丈六年七月思明霪雨壞城七年九月浙江所五颶風驟雨壞城漂流房舍八年七月金鄉備颶風驟雨壞城垣公廡十二年九月密雲後衛霖雨壞城二十年春正月信豐雨水壞城翟城衛如之二十一年二月六安衛霪雨壞城是歲建昌守禦所淮安懷來等衛皆霖雨壞城二十二年二月壽州衛雨水壞城三月贛州振武二衛雨水壞城四月霖雨壞密雲及薊州城是歲南北畿山東州縣霪雨傷麥禾甚衆洪熙元年夏蘇松嘉湖積雨傷稼閏七月京師大雨壞正陽齊化順成等門城垣九月霖雨壞密雲中衛城宣德元年五月永嘉樂清颶風急雨壞公私廡宇及壇廟正統元年七月順天山東河南廣東霪雨傷稼四年夏居庸關及定

州衛霖雨壞城五年二月南京大風雨壞北上門脊覆官民  
舟七年濟南青萊淮鳳徐州五月至六月霪雨傷稼九年閏  
七月野狐嶺等處霖雨壞城及濠塹墩臺十一年春江西七  
府十六縣霪雨田禾滄沒十二年六月瑞金霪雨市水丈餘  
漂倉廬溺死二百餘人十三年四月雨水壞順天古北口邊  
倉五月至六月風陽徽州霖雨傷稼九月寧都大雨壞城郭  
廬舍溺死甚衆景泰三年永平兗州久雨傷禾大嵩等二十  
衛所久雨壞城四年南畿河南山東府十州一自五月至於  
八月霖雨傷稼五年杭嘉湖大雨傷苗六旬不止七月京師  
霖雨九門城垣多壞六年北畿府五河南府二霪雨傷稼雲  
南大理諸府如之七年雨畿江西河南浙江山東山西湖廣



共府三十恒雨澹田天順元年濟堯青三府大雨閱月禾盡  
沒四年安慶南陽自五月雨至七月澹木苗七年五月淮鳳  
揚徐大雨腐二麥武昌漢陽荊州廬舍漂沒民皆依山露宿  
成化元年六月畿東大雨水壞山海關永平薊州遵化城堡  
八月通州大雨壞城及運倉二年定州積雨壞城垣及墩臺  
梁口百七十三八年七月南京大風雨壞天地壇孝陵廟宇  
鳳陽大雨壞皇陵牆垣九年三月南京大風雨拔太廟社稷  
壇樹十三年七月京城大霖雨十四年八月鳳陽大雨沒城  
內民居以千計十七年七月乙酉南京大風雨社稷壇及太  
廟殿宇皆摧十八年河南懷慶諸府夏秋霖雨三月塌城垣  
千一百八十餘丈漂公署壇廟民居三十一萬四千間有奇

澆死者一萬一千八百餘人弘治三年七月南京驟雨壞午門西城垣七年七月庚寅南京大風雨壞殿宇城樓吻獸拔太廟天地社稷壇及孝陵樹自五月至八月義州等衛連雨害稼八年五月南京陰雨踰月壞朝陽門北城堵九月潮州諸府颶風暴雨壞城垣廬舍十年七月安陸靈雨壞城郭廬舍殆盡十一年七月長安嶺暴風雨壞城及廬舍十四年六月義錦廣寧靈雨壞城垣墩堡倉庫橋梁民多壓死者十五年六七月南京大風雨孝陵神宮監及懿文陵樹木橋梁牆垣多摧拔者十六年五月榆林大風雨毀子城垣移垣洞於其南五十步十八年三月雙山堡大雷雨壞城六月至八月京畿連雨正德元年七月鳳陽諸府大雨平地水深丈五尺

沒居民五百餘家二年七月武平大風雨毀贖樓長泰南  
大風雨三日夜平地水深二丈漂民居八百家十二年蘇松  
常鎮嘉湖大雨殺麥禾十三年應天蘇松常鎮揚大雨彌月  
漂室廬人畜無算十六年京師久雨傷稼嘉靖四年六月登  
州大雨壞城十六年京師雨自夏及秋不絕房屋傾倒軍民  
多壓死二十五年八月京師大雨壞九門城垣三十三年六  
月京師大雨平地水數尺四十五年九月鄖陽大霖雨平地  
水丈餘壞城垣廬舍人民溺死無算隆慶元年自五月至七  
月遼東雨不止壞垣牆禾黍萬曆十二年正月喜峰口大風  
雨壞各墩臺十五年五月至七月蘇松諸府霖雨禾麥俱傷  
二十四年杭嘉湖霖雨傷苗二十八年七月興化莆田連江

福安大雨數日夜城垣橋梁堤岸俱圯二十九年春夏蘇松嘉湖霪雨傷麥三十二年七月京師霪雨城崩三十三年五月丙申鳳陽大風雨損皇陵正殿御座三十九年廣西積雨五閱月四十二年浙江霪雨爲災天啓六年閏六月大雨連旬壞天壽山神路都城橋梁是歲遼東霪雨壞山海關內外城垣軍民傷者甚衆七年山東州縣二十有八積雨傷禾崇禎五年六月大霖雨八月又雨衝損慶陵九月順天二十七日縣霪雨害稼十一年夏雨浹旬北南山邊垣十二年十二月浙江霪雨阡陌成巨浸十三年四月至七月寧池諸郡霪雨田半爲壑十五年十月黃蘄德安諸郡縣霪雨

服妖正德元年婦女多用珠結蓋頭謂之瓔珞十三年正月

車駕還京令朝臣用曳撒大帽纓帶給事中朱鳴陽言曳撒大帽行役所用非見君服皆近服妖也十五年十二月帝平宸濠還京俘從逆者及懸諸逆首於竿皆標以白幟數里皆白時帝已不豫見者識其不祥崇禎時朝臣好以紗縠竹籜爲帶取其便易論者謂金銀重而貴紗籜賤而輕殆賤將乘貴也時北方小民製幘低側其簷自掩眉目名曰不認親其後寇亂民散途遇親戚有欲泣不敢言或掉臂去之者

龜孽嘉靖四十一年四月鄂縣散官王金進五色龜

雞禍弘治十四年華容民劉福家雞雛三足十七年六月崇明民顧孟文家雞生雛猴頭而人形身長四寸有尾活動無聲嘉靖四年長垣民王憲家雞抱卵內成人形耳目口鼻四

有異 卷五 十一  
肢皆具萬曆二十六年六月靖邊營軍家雌雞化為雄崇禎  
九年淮安民家牝雞啼躍化為雄十年宣武門外民家白雞  
喙距純赤重四十觔或曰此鷲也所見之處國亡十四年太  
倉衛指揮姜周輔家雞伏子兩頭四翼八足

鼠妖萬曆四十四年七月常鎮淮揚諸郡土鼠千萬成羣夜  
啣尾渡江絡繹不絕幾一月方止四十五年五月南京有鼠  
萬餘啣尾渡江食禾稼崇禎七年寧夏鼠十餘萬啣尾食苗  
十二年黃州鼠食禾渡江五六日不絕時內殿奏章房多鼠  
盜食與人相觸而不畏亦鼠妖也至甲申元旦後鼠始屏跡  
又秦州關山中鼠化鶴鷄者以數千計十五年二月羣鼠渡  
江晝夜不絕十月榆林定邊諸蠻鼠生蝦蟆腹中一生數十

食苗如割

青霄青祥宣德元年八月辛巳東南天有青氣狀如人叉手揖拜

明史彙

志第五終





明史藝

志第六

光祿大夫 經筵講官明史總裁戶部尚書加七級臣王鴻緒奉

敕編撰

五行三金 土

按五行傳好戰攻輕百姓飾城郭侵邊境則金不從革又曰言之不從是謂不乂厥咎僭厥罰恒暘厥極憂時則有詩妖訛言時則有介蟲之孽時則有犬禍時則有日舌之癘時則有白青白祥惟木沴金宋史凡金石之妖旱詩妖民訛毛蟲之孽蒼白氣白氣地生麴天雨紙錢鐵佛動雨錢鏡舞皆屬之金今削毛蟲中白鹿白兔餘從其例

金異洪武八年庫中金銀飛十一年正月元旦早朝殿上金

鐘始叩忽斷爲二六月丁卯夜寧夏衛風雨兜熬旂槩皆有  
火光十二年十二月甲子徐州衛譙樓銅壺自鳴乙丑復鳴  
是歲胡惟庸井中生石笋去之笋復宥出者三次年惟庸伏  
誅建文二年四月乙卯燕王營於蘇家橋兵端火光如毬上  
下相擊金鐵錚錚弓絃自鳴成化十三年六月壬子雨錢於  
京師正德四年三月甲寅蓋州衛城樓鐘自鳴者三七年文  
登秦始皇廟鐘鼓自鳴成山衛如之嘉靖六年五月甲午京  
師雨錢隆慶元年七月遼東旗餘出火民間金釜皆鳴六年  
七月七日有物轟轟飛至直隸華亭海濱墜於地乃鐘也鑄  
時年月具在識者謂其來自熙云萬曆二十一年十月甲申  
山東督撫令旂及刀鎗頭皆火出且有聲二十六年五月庚

寅古浪城樓大鐘自鳴者三十八年九月鄖陽巡撫公署  
角樓上鐘大鳴天啓六年五月六日京城石獅擲出城外銀  
錢器皿飄至昌平閱武場中崇禎六年五月癸巳有鐵斧飛  
落霍山縣七年七月敘州母豬龍洞銅鼓自鳴一日夜八年  
十二月辛巳夜四鼓山東鎮南城樓大砲鳴如鐘至黎明大  
吼一聲乃止十三年三月十五蘄州城隍廟古鐘自鳴

恒暘洪武四年陝西河南山西及直隸常州臨濠北平河間  
永平旱七年夏北平州縣四十二旱八年直隸府四湖廣府  
二北平州二旱二十三年山東旱二十六年京師大旱詔求  
直言永樂十六年陝西旱宣德元年夏江西旱湖廣二十六  
縣夏秋旱二年南畿湖廣山東山西陝西河南南州縣五十餘

旱七年河南州縣四十四大名州縣七夏秋旱八年南北畿  
河南山東山西自春徂夏不雨九年南畿湖廣江西浙江及  
真定濟南東昌兗州平陽重慶等府旱十年畿輔旱正統二  
年河南春旱順德兗州春夏旱平涼等六府秋旱三年南畿  
浙江湖廣江西九府旱四年直隸陝西河南及太原平陽春  
夏旱五年江西夏秋旱南畿湖廣四川府五州衛各一自六  
月不雨至於八月六年陝西旱南北畿浙江湖廣江西府州  
縣十五春夏並旱七年南畿浙江湖廣江西府州縣衛二十七  
餘大旱十一年湖廣及重慶等府夏秋旱十二年南畿及山  
西湖廣等府七夏旱十三年直隸陝西湖廣府州七夏秋旱  
十四年六月順天保定河間真定旱景泰元年畿輔山東河

南旱二年陝西府四衛九旱三年江西旱四年南北畿河南  
及湖廣府三數月不雨五年山東河南旱六年南畿及山東  
山西河南陝西江西湖廣府三十三州衛十五皆旱七年湖  
廣浙江及南畿江西山西府十七旱天順元年夏兩京不雨  
杭州寧波金華均州亦旱三年南北畿浙江湖廣江西四川  
廣西貴州旱四年濟南青州登州肇慶桂林甘肅諸府衛夏  
旱五年南畿府四州一及錦衣等衛連月旱傷稼七年北畿  
旱濟南青州東昌衛輝自正月不雨至於四月成化三年湖  
廣江西及南京十一衛旱四年兩京春夏不雨湖廣江西旱  
六年直隸山東河南陝西四川府縣衛多旱八年京畿連月  
不雨運河水涸遣官祭告天地社稷山川并淮瀆東海之神

順德真定武昌俱旱九年彰德衛輝平陽旱十三年四月京  
師旱是歲真定河間長沙皆旱十五年京畿大旱至明年三  
月遣官祭告天地社稷山川是歲順德鳳陽徐州濟南河南  
皆旱十八年兩京湖廣河南陝西府十五州二旱山西大旱  
十九年復旱二十年京畿山東湖廣陝西河南山西俱大旱  
二十二年六月陝西旱蟲鼠食苗稼凡九十五州縣八月北  
畿及江西三府旱九月溫台大旱長沙諸府亦旱弘治元年  
南畿河南四川及武昌諸府旱三年兩京陝西山東山西湖  
廣貴州及開封旱四年浙江府二廣西府八及陝西洮州衛  
旱六年北直山東河南山西及襄陽徐州旱七年福建四川  
山西陝西遼東旱八年京畿陝西山西湖廣江西大旱十年

順天淮安太原平陽西安延安慶陽早十一年河南山東廣  
西江西山西府十八年十二年夏河南四府旱秋山東旱十  
三年慶陽太原平陽汾潞旱十四年遼東鎮春至秋不雨河  
溝盡涸十六年夏京師大旱蘇松常鎮夏秋旱十八年北京  
及應天四十二衛旱正德元年陝西三府旱二年貴州山西  
旱三年江南北旱四年春京師旱自三月至七月遣官祈禱  
者三是年陝西亦旱七年鳳陽蘇松常鎮平陽太原臨鞏旱  
八年畿輔及開封大同浙江六縣旱九年順天河間保定廣  
鳳淮揚旱十一年北畿及兗州西安大同旱十五年淮揚鳳  
陽州縣三十六及臨鞏甘州旱十六年兩京山東河南山西  
陝西自正月不雨至於六月嘉靖元年南畿江西浙江湖廣

四川遼東旱二年兩京山東河南湖廣江西及嘉興大同咸  
都俱旱赤地千里殍殮載道三年山東旱五年江左大旱六  
年北畿四府河南山西及鳳陽淮安俱旱七年北畿湖廣河  
南山東山西陝西大旱八年山西及臨洮鞏昌旱九年應天  
蘇松旱十年陝西山西大旱十一年湖廣陝西大旱十七年  
夏四月兩京山東陝西福建湖廣大旱十九年畿內旱二十  
年三月京師久旱帝親禱雨二十三年湖廣江西旱二十四  
年南北畿山東山西陝西浙江江西湖廣河南俱旱二十五  
年南畿江西旱二十九年北畿山西陝西旱三十三年兗州  
東昌淮安揚州徐州武昌旱三十四年陝西五府及太原旱  
三十五年夏山東旱三十七年五月京師大旱禾盡禱三十



八年蘇松旱三十九年太原延安慶陽西夏旱四十年保定  
等六府旱四十一年西安等六府旱隆慶二年浙江福建四  
川陝西及淮安鳳陽大旱四年京師夏旱詔諸司停刑六年  
夏京師不雨萬曆十一年八月庚戌朔河東鹽臣言解池旱  
涸鹽花不生是秋京師不雨至十三年八月河井並涸十四  
年三月乙巳以久旱命順天府祈禱十六七年蘇松連歲大  
旱震澤爲平陸二十四年杭嘉湖三府旱二十九年五月畿  
輔山東山西河南及貴州黔東諸府衛旱三十四年夏京師  
亢旱三十七年楚蜀河南山東山西陝西皆旱三十八年濟  
青登萊四府大旱四十二年夏京師不雨四十三年三月不  
雨至於六月遣官分禱是歲山東春夏大旱千里如焚四十

四年陝西旱秋冬廣東大旱四十五年夏畿南亢旱四十七年廣西梧州旱赤地千里泰昌元年遼東旱天啓元年京師久旱五年真順保河四府三伏不雨秋復旱七年四川大旱崇禎元年夏畿輔旱赤地千里遣官分禱三年三月京師旱擇日親禱五年杭嘉湖三府自八月至十月七旬不雨六年京師及江西旱十年夏京師及河東不雨江西大旱十一年兩京及山東山西陝西旱十二年畿南山東河南山西浙江旱十三年兩京及登青萊三府旱十四年兩京山東河南湖廣及宣大邊地旱

詩妖太祖吳元年張士誠弟僞丞相士信及黃敬夫葉德新蔡彥文用事時有十七字謠曰丞相做事業專靠黃蔡葉一

朝西風起乾鱉未幾明兵下蘇州士信及三人者皆被誅其應也建文初年有道士歌於途曰莫逐燕逐燕日高飛高飛上帝畿已忽不見成祖自燕王被迫蹙遂興靖難之師逐燕高飛是其讖也正統二年京師旱街巷小兒爲土龍禱雨拜而歌曰雨帝雨帝城隍土地雨若再來還我土地土木之變郕王監國已而卽位繼又有英宗復辟之舉說者謂雨帝者與弟帝弟同音城隍者郕王再來還土地者復辟也萬曆末年有道士歌於市曰委鬼當頭坐茄花遍地生北人讀客爲楷茄又轉音後爲魏忠賢客氏之兆崇禎元年內侍於五鳳樓前獲一黃袱內襲小函一卷題曰天啓七崇禎十七還有福王一後果盡驗又成都東門外鎮江橋迺瀾塔萬曆中

布政余一龍所修也張獻忠破蜀毀之穿地取磚得古碑上有篆書云修塔余一龍拆塔張獻忠歲逢甲乙丙此地血流紅妖運終川北毒氣播川東吹簫不用竹一箭貫當胸漢炎興元年丞相諸葛孔明記

本朝大兵西征獻忠被射而死時肅王爲將又有謠曰鄴臺復鄴臺曹操再出來賊羅汝材自號曹操此其兆也

毛蟲之孽弘治九年八月有黑熊自都城蓮池緣城上西直門官軍逐之乃入地不能獲斃死一人傷一人十一年六月有熊自西直門入城郎中何孟春曰當備盜亦宜慎火宋紹興間熊抵永嘉城州守高世則以熊字能火戒郡中慎火果延燒廬舍此其兆也是年城內多火災嘉靖五年七月南城

縣有虎其人手足四十五年六月太醫監史曰李章獻預備五色以爲瑞兔云

犬禍嘉靖二十年民家生一犬八足四耳四目萬曆四十七年七月懷寧民家產一犬長五寸高四寸一頭二身八脚狀如人

白昏白祥洪武十四年九月甲辰白氣貫日洪熙元年六月庚戌中天有白氣東西竟天宣德元年六月癸未夜有蒼白氣東西竟天八月庚辰東南有白雲狀如羣羊驚走旣滅有黑氣如死蛇頭之分而爲二十一月丙辰昏北方有蒼白雲東西竟天六年二月壬子昏西方有蒼白雲南北竟天正統三年七月己亥夜中天有蒼白雲氣南北亘天貫南北斗中

八年十一月戊辰夜東南方有蒼白雲東西亘天十四年十月庚申晝生蒼白雲復化爲三西南東北亘天景泰元年九月丙寅有蒼白雲氣南北亘天二年九月辛酉夜蒼白雲三東西亘天成化二年三月辛未南方白雲氣東西竟天弘治五年十二月辛亥夜東方有白氣南北亘天去地五丈正德元年三月戊申夜太原空中見紅光如彎弓長六七尺旋變黃又變白漸長至二十餘丈光甚亘天嘉靖七年十二月望白氣亘天津萬曆十年甘涼州赤白雲氣匝繞半天四十六年東方有白氣長亘天四十八年禮部奏八月以前輦轂之下屢見白氣橫天天啓六年四月己亥東北方有白雲名天裂氣

按五行傳修宮室飾臺榭內淫亂犯親戚侮父兄則稼穡不成又曰思心不睿是謂不聖厥咎霧厥罰恒風厥極凶短折時則有脂夜之妖時則有華孽羸蟲之孽時則有牛禍時則有心腹之病時則有黃眚黃祥時則有木火金水沴土宋史  
凡年饑大風風霾晦冥日食既花妖蟲孽牛禍黃眚黃祥地震地陷山圯雨毛地生毛皆屬之土日食既歸天文餘從其例

年饑洪武二年湖廣陝西饑四年陝西沔饑五年濟南東昌萊州大饑草實樹皮食爲之盡六年蘇州揚州直定延安饑七年北平所屬州縣二十三饑十五年河南饑十九年春河南饑夏青州饑二十年山東三府饑二十三年湖廣三府二

州饑二十四年山東及太原饑徐沛民食草實二十五年山東  
東游饑永樂元年北畿山東河南及鳳陽淮安徐州上海饑  
二年蘇松嘉湖四府饑四年南畿浙江陝西湖廣府州縣衛  
十四饑五年順天保定河間饑十年山東饑十二年直省州  
縣二十四饑十三年順天青州開封三府饑十四年平陽大  
同二府饑十八年青萊二府大饑時皇太子赴北京過鄒縣  
命亟發官粟以賑洪熙元年北畿饑山東河南湖廣及南畿  
州縣三十四饑宣德元年直省州縣二十九饑二年直省縣  
十四饑三年直省州縣十五饑六年直省縣十饑八年以水  
旱缺食奏者府州縣七十有六九年南畿山東浙江陝西山  
西江西四川多告饑湖廣尤甚十年揚徐滁南昌大饑正統



三年春平涼鳳翔西安鞏昌漢中慶陽兗州七府及南畿三州二縣江西浙江六縣饑四年直省州縣徭十八及山西鹽州大同宣府偏頭諸關饑五年直省十府一州二縣饑陝西大饑六年直省州縣二十六饑八年夏湖南饑秋應天鎮江常州三府饑九年春蘇州府饑是歲雲南陝西乏食十年陝西山西饑十二年夏淮安岳州襄陽荊州郴州俱洊饑十三年寧紹二府及州縣七饑景泰元年大名順德廣平保定處州太原大同七府饑二年大名廣平又饑順天保定西安臨洮太原大同解州饑三年淮徐大饑死者相枕籍四年徐州洧饑河南山東及鳳陽饑五年兩畿十府饑六年春兩畿山東山西浙江江西湖廣雲南貴州饑蘇松尤甚七年北畿山

東江西雲南又饑河南亦饑天順元年北畿山東竝饑發瑩  
募斫道樹殆盡父子或自相食二年長沙辰州永州常德岳  
州五府及銅鼓五開諸衛饑四年湖廣及鎮遠府都勻平越  
諸衛饑六年陝西饑成化元年兩畿浙江河南饑二年南畿  
饑四年兩畿湖廣山東河南無麥鳳陽及陝西寧夏甘涼饑  
五年陝西洮饑六年順天河南直定保定四府饑食草木殆  
盡山西兩廣雲南竝饑八年山東饑九年山東又大饑骼無  
餘齒十三年南畿山東饑十四年北畿湖廣河南山東陝西  
山西饑十五年江西饑十六年北畿山東雲南饑十八年南  
畿遼東饑十九年鳳陽淮安揚州三府饑二十年陝西饑道  
殍相望畿南及山西平陽饑二十一年北畿山東河南饑二

十三年陝西大饑武功民王瑾殺宿客以食淮北山東亦饑  
弘治元年應天及浙江饑六年山東饑七年保定真定河間  
三府饑八年蘇松嘉湖四府饑十四年順天永平河間河南  
四府饑遼東大饑十五年遼東洺饑兗州饑十六年浙江山  
東及南畿四府三州饑十七年淮揚廬鳳洺饑人相食且發  
廩蓄以繼之十八年延安諸府饑正德三年廬鳳淮揚四府  
饑四年蘇松常鎮四府饑五年山東饑七年嘉興金華溫台  
寧紹六府乏食八年河間保定饑九年春永平諸府饑民食  
草樹殆盡有闔室死者秋關陝亦饑十一年順天河間饑河  
南大饑十二年春順天保定永平饑十三年蘇松廬鳳淮揚  
六府饑十四年冬遼東饑南畿淮揚諸府尤甚十六年遼東

饑嘉靖二年應天及滁州大饑三年湖廣河南大名臨清饑  
南畿諸郡大饑婺婦劉氏食四歲小兒百戶姚臣王堂以子  
鬻母軍餘曹洪以弟殺兄王明以子殺父道殣相望臭彌千  
里四年河間瀋陽大同三衛饑五年順天保定河間三府大  
饑六年遼東大饑八年真定廬鳳淮揚五府徐滁和三州及  
山東河南湖廣山西陝西四川饑襄陽尤甚九年畿內河南  
湖廣山東山西大饑十二年北畿山東饑十五年湖廣大饑  
十七年北畿饑河南鄆陽襄陽三府饑二十年保定遼東饑  
二十一年順天永平饑二十四年又饑南畿亦饑二十五年  
順天饑江西亦饑二十七年鞏昌漢中大饑三十一年宣大  
二鎮大饑人相食三十二年南畿廬鳳淮揚山東河南陝西

並饑三十三年順天及榆林饑三十六年遼東大饑人相食  
三十九年順天永平饑四十年兩畿山西饑四十三年北畿  
山東大饑四十四年順天饑四十五年淮徐饑隆慶元年蘇  
松二府大饑二年湖廣饑萬曆元年淮鳳二府飢民多爲盜  
十年延安慶陽平涼臨洮鞏昌大饑十三年湖廣饑十五年  
七月部臣言黃河以北民食草木富平蒲城同官諸縣有以  
石爲糧者十六年河南飢民相食蘇松湖三府饑二十二年  
河南大饑給事中楊明繪飢民圖以進巡按陳登雲進飢民  
所食雁糞帝覽之動容二十八年山東及河間饑二十九年  
兩畿饑阜平縣民有殺其六歲兒烹食之者蘇州飢民鬻殺  
稅使七人三十七年山西饑四十年南畿游饑鳳陽尤甚四

十三年浙江饑四十四年山東饑甚人相食河南及淮徐亦饑四十五年北畿飢民食草木逃就食者相望於道山東屬邑多饑四十六年陝西饑四十八年湖廣大饑崇禎元年陝西饑延鞏民相聚爲盜二年山西陝西饑四年陝西饑五年淮揚諸府饑流殍載道六年陝西山西大饑淮揚海饑有夫妻雉經於樹及投河者鹽城教官王明佐至自縊於官署七年京師饑御史龔廷獻繪飢民圖以進太原大饑人相食永寧州飢民蘇倚哥兒至殺其父學與母王氏同食九年南陽大饑有母烹其女者江西亦饑十年浙江大饑父子兄弟夫妻相食十二年兩畿山東山西陝西江西饑河南大饑人相食廬氏嵩伊陽三縣尤甚十三年北畿山東河南陝西山西

浙江三吳皆饑自淮而北至畿南樹皮食盡發瘞以繼之  
十四年南畿饑金壇民於延慶寺近山見人云此地深入尺  
餘其土可食如言取之淘磨爲粉粥而食取者日衆又有長  
山十里亦出土堪食其色青白類茯苓又石子澗土黃赤狀  
如豬肝俗呼觀音粉食之多腹痛隕墜卒枕籍以死是歲畿  
南山東游饑德州斗米千錢父子相食行人斷絕大盜滋矣  
恒風洪武二十三年七月癸巳海門縣風潮壞官民廬舍漂  
溺者衆永樂八年七月平陽縣風潮漂廬舍九年七月海寧  
風潮溺死居民壞廬舍城垣宣德六年六月溫州颶風大作  
壞公廨祠廟倉庫城垣正統四年七月蘇松常鎮四府大風  
拔木殺稼天順二年二月暴風拔孝陵松樹懿文陵殿獸脊

梁柱多摧三年四月順天河間真定保定廣平濟南連日烈  
風麥苗盡敗八年大風飄瓦拔木壞郊壇成化十四年八月  
丁未南京大風拔太廟樹十五年八月辛卯大風拔孝陵木  
二十一年五月南京大風拔太廟樹摧大祀殿及皇城各門  
獸吻弘治三年六月壬午朔陝西靖虜衛大風天地昏暗變  
爲紅光如火久之乃息七年三月己亥廣寧諸衛狂風藩陽  
錦州城仆百餘丈正德元年六月辛酉暴風折郊壇松柏壞  
大祀殿齋宮二年閏正月乙丑大風壞奉天門右吻三年二  
月己丑大同暴風屋瓦飛動三日而止九年二月丁巳長樂  
大雨雹狂風震電屋瓦皆飛五月戊辰曲阜暴風毀宣聖廟  
獸吻十二年四月丙辰來賓大風雨雹毀官民廬舍屋瓦皆



飛十一月癸巳南京大風雪仆孝陵殿前樹及圍牆內外松  
柏十二月己酉大理衛大風壞城樓十三年三月甲寅慶符  
大風雹壞學宮十六年十二月辛卯甘肅行都司狂風壞官  
民廬舍樹木無算嘉靖元年七月己巳南京暴風雨郊社陵  
寢宮闕城垣獸吻脊欄皆壞拔樹萬餘株五年禮部言大風  
捲廟宇及民舍百餘家萬曆十八年三月甲辰大名狂風天  
色乍黑乍赤二十六年十月癸亥喜峰路臺西北樓內旋風  
大作黑氣沖天樓內有火光三十四年七月丙戌大風拔朝  
日壇大槐樹四十一年八月乙未青州大風拔樹傾城屋天  
啓元年三月辛亥大風揚塵四塞命太常寺以六月二十二  
日祀火德之神著爲令四年五月癸亥乾清宮東丹堦旋風

驟作內官監鐵片大如屋頂者盤旋空中墮於西墀鏗訇若雷八月戊戌薊州寒風殺人崇禎十四年五月南陽大風拔屋飛瓦七月乙亥福州大風壞官署民舍海潮泛溢禾稼漂沒壓溺死者甚衆十五年五月保定廣平諸縣怪風麥禾俱傷

風霾晦冥建文元年七月癸酉燕王起兵風雲四起咫尺不辨人少焉東方露青天尺許有光燭地洞徹上下正統九年十二月甘肅大風晝晦景泰元年閏正月烈風晝晦五年黃沙四塞晝晦六年二月黃沙蔽天晝晦者數日天順八年二月壬子風霾晝晦成化六年二月丁丑開封晝晦如夜黃霾蔽天三月辛巳雨霾晝晦九年三月癸未濟南諸府狂風晝

晦咫尺莫辨二十一年三月戊子大名風霾自辰迄申紅黃  
滿空俄黑如夜已而雨沙數日乃止京師自正月至三月風  
霾不雨弘治二年二月辛亥開封晝晦如夜三月黃塵四塞  
風霾蔽天者累日四年八月乙卯南京晦冥七年三月己亥  
廣寧諸衛晝晦十一月雲南晝晦正德二年閏正月癸亥盧  
龍遷安二縣大風拔木毀民居霾曠如夜五年三月甲子大  
風霾天色晦冥者數日十六年十一月辛酉甘肅行都司黑  
風晝晦翌日方散嘉靖元年九月己巳大風揚塵晝晦八年  
正月戊戌朔風霾晦如夕九年三月京師大風晝晦二十六  
年七月乙丑甘州五衛風霾晝晦色赤復黃二十八年三月  
丙申風霾四塞日色慘白凡五日三十年正月辛卯大風揚

塵蔽天晝晦四十年二月己酉亦如之四月癸巳大風雨黃  
土晝晦四十三年三月望異風作赤黃霾至二十一日乃止  
隆慶二年正月元旦大風揚沙走石白晝晦冥自北畿抵江  
浙皆同萬曆十七年正月乙丑蓋州衛風霾壞廨宇廬舍二  
十九年四月連日風霾三十八年四月戊戌崇陽風霾晝晦  
至夜轉烈損官民屋木無算四十八年禮部言八月以前雲  
南諸府時晝晦天啓元年四月乙亥午寧夏洪廣堡風霾大  
作墜灰片如瓜子紛紛不絕踰時而止日將沈作紅黃色外  
如炊烟圍罩畝許日光所射如火焰夜分乃沒四年二月辛  
丑風霾晝晦塵沙蔽天連日不止崇禎元年正月癸亥永年  
縣晝晦七年三月戊子黃州晝晦十三年閏正月丙申南京

日色晦蒙風靈大作緇灰從空下五步外不見一物十七年三月丙申風霾晝晦

花華弘治十六年九月安陸桃李華正德元年九月宛平棗林莊李花盛開其冬永嘉花盡放至來年之春六年八月霸州桃李華

蟲孽景泰五年三月畿南五府有蟲食桑春蠶不育弘治六年八月己巳臨晉雨蟲如雪七年三月廣寧諸衛有黑蟲墮地大如蠅久之入於土崇禎十年天雨黑蟲於黃州大如菽食苗盡

牛禍正德十二年徐州牛產犢一頭二舌兩尾八足嘉靖五年七月南陽牛產犢一首兩身禮部又奏有牛產犢一身二

首腹內心肺胆各二六年十一月漳浦有牛產犢三目三角  
十一年二月銅仁黃犛產犢滿身有紋卽死十二年山東平  
山衛牛犢有文前兩足及尾悉具鱗甲中皆毳毛萬曆十三  
年九月光山牛產一物火光滿地鱗甲森然一夕斃三十七  
年五月歷城高苑二縣牛各產犢雙頭三眼兩鼻二口三十  
八年三月獲嘉牛產犢一身兩頭四眼四耳兩口兩足一尾  
三十九年二月汲縣牛產犢一膊兩頭兩嘴四眼兩耳七蹄  
四月降夷部牛產犢人頭羊耳又生一羊羔人面羊身四十  
五年八月關州牛產犢兩口三眼四十八年陝西全山堡產  
牛妖天啓元年十月會寧牛產異獸徧體鱗甲有火光三年  
十月沅陵犛生犢一身二頭三尾七年三月莒州牛產犢如

麟崇禎十三年襄陽牛產犢兩頭二月

黃會黃神正統十一年二月辛酉有異氣現華蓋殿金頂及  
通天殿賜吻之上成化九年四月乙亥京師雨土十三年四  
月戊戌陝西甘肅冰厚五尺間以雜沙有青紅黃黑四色弘  
治十年三月巳酉雨土十一年四月辛巳雨土十七年二月  
甲辰鄖陽均州雨沙嘉靖元年正月丁卯雨黃沙十三年二  
月巳未雨微土二十一年象山雨黃霧行人口耳皆塞隆慶  
元年三月甲寅南鄭雨土萬曆二十五年二月癸亥湖州雨  
黃沙四十六年三月庚午暮天雨土濛濛如霧如霰入夜不  
止四十七年二月甲戌從未至酉塵沙漲天其色赤黃四十  
八年山東省城及泰安肥城皆雨土崇禎十二年二月壬申

濟縣有黑黃雲起旋分爲二頃之四塞狂風大作黃埃漫天間以青白氣五步之外不辨人踪至昏始定

地震洪武四年正月己丑鞏昌臨洮慶陽地震五年七月壬戌京師風雨地震十七日又震是年六月至十月陽曲地震五年四月乙巳寧夏地震壞城垣五月庚辰遼東地震有聲自東北之西南十九年六月辛丑雲南地震十一月己卯復震有聲二十三年正月庚辰山東地震建文元年京師地震求直言永樂元年十一月甲午北京地震二年十一月癸丑京師濟南並震有聲六年五月壬戌十一年八月甲子京師復震十三年九月壬戌十四年九月癸卯十八年五月丙午北



京地竝震洪熙元年南京地震凡四十有二六安衛地震七日乃止宣德元年七月癸巳京師地震有聲自西北迄東南是歲南京地震者九二年春復震者十三年復屢震四年南京地震五年正月十一月南京震者再正統四年六月乙未京師地震八月己亥又震五年十月庚午蘭州莊浪地震十日壞城堡廬舍壓死人畜十年二月丁巳京師地震景泰二年七月癸丑京師地震八月壬申南京地震三年七月永新珠坑村地陷十七所六年二月甲午安福大雷雨白泉陂羊塘地陷二一深三丈廣十餘丈一深六尺廣一丈有奇天順元年十月乙巳南京地震成化元年四月甲申鈞州地震二十三日乃止禮部奏爲變異之甚請帝修省三年四川地震

凡三百七十五月壬申宣府大同地震有聲威遠朔州亦震壞墩臺牆垣壓傷人四年八月癸巳京師地震有聲十二月戊戌湖廣地震五年十二月丙辰汝寧武昌漢陽岳州同日地震六年正月丁亥河南地震是年湖廣亦震十年四月壬午鶴慶地震九月己巳自寅至申復十五震壞廨舍民居傷人章十月丁酉靈州大沙井驛地震有聲如雷自後晝夜屢震至十一月甲寅一日十一震城柴房屋多圯十二年正月辛亥南京地震十月辛巳京師地震十三年閏二月癸卯臨洮鞏昌地震城有頽者四月戊戌甘肅地裂又震有聲榆林涼州亦震寧夏大震聲如雷先是六年夏八年秋俱再震九年春夏三震至是城垣崩壞者八十三處迄憲宗之世復

八震九月甲戌京師地三震十四年六月太平府地震至八月已巳凡七震七月四川鹽井衛地連震靡宇傾覆人畜多死十六年八月丁巳四川越嶲衛一日七震越數日連震十七年二月甲寅南京鳳陽廬州淮安揚州和州兗州及河南州縣同日地震禮部言占應水災請濬河築隄以防水患二十年正月庚寅京師及永平宣府遼東皆震宣府地裂湧沙出水天壽山密雲古北口居庸關城垣墩堡多摧人有壓死者九月辛巳費縣地陷深二尺縱橫三丈許二十一年二月壬申泰安地震三月壬午朔復震聲如雷泰山動搖後四月微震癸巳乙未庚子連震閏四月癸巳薊州地震有聲越數日復連震城垣民居有頽仆者五月壬寅京師地再震九月

丙辰廉州梧州地震有聲連震者十六日方止十一月丙寅  
京師地震二十二年六月壬辰漢中及寧羌衛地裂或十餘  
丈或六七丈寶雞裂三里濶丈餘九月辛亥成都地一日七  
八震俱有聲次日復震弘治元年八月戊申宣府葛峪堡地  
陷深三尺長百五十步濶一丈沙河中湧隣高一尺長七十  
步十二月辛卯四川地震連三日二年五月庚申成都地震  
連三日有聲三年十二月己未京師地再震四年六月辛亥  
復三震八月乙卯南京地震屋宇皆搖淮揚二府同日震六  
年三月寧夏地震連三年共二十震四月甲辰開封衛輝東  
昌兗州同日地震有聲七年二月丁丑曲靖地震壞房屋壓  
死軍民是歲兩京竝六震八年九月甲午至辛丑安南衛地

十二震十月壬戌至甲子海州九震是歲南京地再震九年  
兩京地皆四震十年六月乙亥海豐地震聲如雷數日乃止  
是歲寧夏榆林鎮番靈州太原皆震屯雷尤甚如舟將覆屋  
瓦皆落十一年六月丙子桂林地有聲若雷旋陷九處大者  
圍十七丈小者七丈或三丈十四年正月庚戌朔延安慶陽  
二府同華諸州咸陽長安諸縣潼關諸衛連日地震有聲如  
雷朝邑尤甚至十七日震猶不已城垣民舍多摧壓死者甚  
衆縣東地拆水溢成河自夏至冬復七震蒲州自元日始連  
震八日又自乙未至丁亥凡二十九震是月丁丑福興泉澶  
四府地震八月癸酉貴州地三震十月辛酉南京地震十五  
年九月丙戌大名順德濟南東昌兗州徐州同日地震壞城

垣民舍濮州尤甚壓死百餘人山東守臣上言半月三震動  
搖泰山遠及千里地道不寧莫此爲甚是月開封彰德平陽  
澤潞亦震十八年九月癸巳杭嘉紹寧四府地震有聲甲午  
南京及蘇松常鎮淮揚寧七府通和二州同日地震正德元  
年二月癸酉至乙亥邵陽地震者十餘有聲如雷三月丁亥  
雲南府連日再震木密關地震如雷凡五壞城垣屋舍壓傷  
人萊州自九月至十二月地震四十五俱有聲如雷二年九  
月庚午安州新興州三日連震搖撼民居人有壓死者四年  
三月甲寅廣寧大興堡地陷長四尺濶三尺深四丈餘五月  
己亥夜武昌見碧光如電者六七聲如雷鼓已而地震六年  
四月楚雄地三日五震至明年五月又連震十三日十月甲

辰大理府鄧川州劍川州洱海衛地震九年九月甚壞城垣房廡人有壓死者十一月戊午京師地震保定河間二府及八縣三衛山東武定州同日皆震薊州連三日十九震七年八月騰衝衛地震兩日壞城樓官民廡宇赤水湧出田禾盡沒死傷甚衆九年八月乙巳京師大震十年五月雲南趙州永寧衛地震踰月不止有一日二三十震者黑風如霧地裂水湧壞城垣官廡民居不可勝計死者數千人傷倍之八月大理地震四日十一年八月戊辰南京地震十二年四月戊辰新興州及通海河西嶧峨諸縣地震壞城樓房屋民有壓死者九月己卯濟青登萊四府地震是歲泉州二月至六月金華二月至七月皆數震十四年九月丙辰福興泉三府

地震十五年三月丙申安寧姚安賓州蒙化鶴慶俱地震蒙  
化震二日仆城垣廬舍民有壓死者八月辛酉景東衛地震  
聲如雷搖仆城牆廡宇地多拆裂乙丑濟南東昌開封地震  
嘉靖二年正月南京鳳陽山東河南陝西地震七月壬申浙  
江定海諸衛地震城堞盡毀三年正月丙寅大名三州縣西  
安開封許州皆震辛亥蘇常鎮三府地震是年南京震者再  
四年八月癸卯徐州鳳陽一衛三州縣及懷慶開封二府俱  
地震有聲如雷九月壬申鳳陽徐州及開封二縣復震五年  
四月癸亥永昌騰衝騰越同日地震貴州安南衛地震聲如  
雷壞城垣壬申復震六年十月戊辰京師地震十二年八月  
丁酉京師地震十五年十月庚寅京師及永平保定萬全都



司各衛所地震十八年七月庚寅楚雄臨安廣西地震十九  
年四月庚午洮州甘肅俱震二十一年九月甲戌平陽固原  
寧夏洮州同日震有聲十一月丁巳鞏昌固原西安鳳翔地  
震二十二年三月乙巳太原地震有聲凡十日明年三月復  
如之四月庚辰福興泉漳四府地震二十三年三月朔太原  
地震有聲者十日二十七年七月戊寅京師及保定地震三  
十年六月癸亥兗州府地震有聲秋京師地震有聲三十一  
年三月丙戌山西地震有聲十二月乙卯化州地震大桂山  
有聲如雷三十四年十二月壬寅山西陝西河南同時地震  
如雷渭南華州朝邑三原蒲州尤甚或地裂泉湧中有魚  
物或城郭房屋陷入地中或平地突成山阜或一日數震或

累日震不止河渭大泛華嶽終南山鳴河清數日官吏軍民  
壓死八十三萬有奇三十七年正月庚申陝西地震五月丁  
卯蒲州地連震三日聲如雷六月甲申又震三十八年七月  
辛巳南京地震有聲三十九年四月嘉興湖州地震屋廬搖  
動如帆河水撞激魚皆躍起四十年二月戊戌甘肅山丹衛  
地震有聲壞城堡廬舍六月壬午太原大同榆林地震寧夏  
固原尤甚城垣墩臺府屋皆摧地湧黑黃沙水壓死軍民無  
算壞廣武紅寺等城四十一年正月丙申京師地震是歲寧  
夏地震圮邊牆四十五年癸巳朔福興泉三府地震隆慶二  
年三月甲寅陝西之慶陽西安漢中寧夏山西之蒲州安邑  
湖廣之鄖陽河南之裕州十五州縣同日地震戊寅京師地

震是日山東登州四川順義等縣同日震樂亭地裂三文餘者二黑沙水湧出寧遠城崩四月京師地震癸未懷慶南陽汝寧寧夏同日地震乙酉鳳翔平涼西安慶陽地震壞城傷人命巡撫都御史張祉告祭西嶽華山西鎮吳山之神七月辛酉陵川地裂三十餘步三年十一月庚辰京師地震四年四月戊戌京師地震五年二月丙午廣西靖江王府及宗室所居布政司官署俱地陷六月辛卯朔京師地震者三詔百官青衣角帶修省萬曆元年八月戊申荊州地震至丙寅方止二年二月癸亥長汀地震裂成坑陷沒民居三年二月甲戌湖廣江西地震五月戊戌襄陽鄖陽及南陽府屬地震三日己亥信陽亦震九月戊午京師地震十月丁卯又震命百

官修省三日巳卯岷州衛地震巳丑至壬午連百餘震四年  
二月庚辰薊遼地震辛巳又震五年二月辛巳騰越地二十  
餘震次日復震山崩水湧壞廟廡倉舍民居十七壓死軍民  
甚衆六年二月辛卯臨桂村田中青烟直上隨裂地丈餘鼓  
聲轟轟民居及大樹石皆陷八年五月壬午遵化數震七日  
乃止七月甲午井坪路地大震摧城垣數百丈九年四月巳  
酉蔚州地震聲如雷房屋震裂大同鎮堡各州縣同時地震  
有聲十二年京師地震者再十三年二月丁未淮安揚州廬  
州及上元江寧江浦六合俱地震江濤沸騰三月戊寅山西  
山陰縣地震旬有五日乃止八月巳酉京師地震十五年三  
月壬辰開封府屬地震者三彭德衛輝懷慶同日震十六年

六月庚申京師地震再震十七年七月己未杭州溫州紹興地震十八年六月丙子甘肅臨洮地震壞城郭廬舍壓死人畜無算八月福建地震屢震十九年十月戊戌山丹衛地震壞城垣二十三年十二月二十六日陝西地震聲若雷二十四年十一月福建地震二十五年正月壬辰朔四川地震三日乃止八月己卯遼陽廣寧諸衛地震湧水三日是歲京師再震二十六年正月朔寧夏地震次日長樂陷地五丈八月丁丑京師地震有聲二十七年七月辛未承天沔陽岳州地震二十八年二月戊寅京師地震自良方西南行如是者再五月山東有磁甕七飛出城五里三十一年五月戊寅京師地震三十二年閏九月庚辰鞏昌及醴泉地一日十餘震城郭民

居竝摧白陽吳泉界地裂三丈溢出黑水搏激丈餘三十三  
年五月辛丑陸川地震聲若崩山壞城垣府屋壓死男婦無  
算六月庚午靈川社壇有聲陷地十餘丈深丈餘九月丙申  
京師地震自東北向西南行日再震三十四年六月丙辰陝  
西地震三十五年七月乙卯松潘茂州汶川地震數日三十  
六年京師地震者再三十七年六月辛酉甘肅地震紅崖溝  
水諸堡壓死軍民八百四十餘人圯邊墩八百七十里裂東  
關地四十年二月乙亥雲南大理武定曲靖地大震次日又  
震緬甸亦震五月戊戌雲南大理曲靖復大震壞房屋四十  
二年九月庚午山西河南地震四十三年二月己卯揚州地  
震狼山寺燬壞者備八月乙亥楚雄地震如雷人民驚殞九

月辛卯遼東地震聲如雷十一月辛酉京師地震四十五年  
八月濟南地裂者二四十六年六月壬午京師地震九月乙  
卯北畿山西州縣一十有七及紫荊關馬水沿河二口偏頭  
神池同日皆震京師又震四十八年雲南及肇慶惠州荊州  
襄陽承天沔陽京山皆地震天啓元年四月癸丑延綏孤山  
城陷三十五丈入地二丈七尺二年二月癸酉濟南東昌河  
南海寧地震三月濟南東昌屬縣八自七日至九日連震壞  
民居無數九月甲寅平涼隆德諸縣鎮戎平虜諸所馬剛雙  
峯諸堡地震如翻壞城垣七千九百餘丈屋宇萬一千八百  
餘區壓死男婦萬二千餘口十一月癸卯陝西地震三年閏  
十月乙卯雲南地震十二月丁未南畿六府二州俱地震揚

州尤甚是歲京師地震者三四年二月丁酉薊州永平山海地屢震甲寅京師地震宮殿動搖有聲銅缸之水騰波震盪樂亭地裂湧黑水尺餘三月丙辰又震庚申再震六月丁亥保定地震壞城郭人畜八月己酉陝西地震六年六月濟南東昌及河南一州六縣同日震天津三衛宣府大同俱數十震死傷慘甚山西靈丘晝夜數震月餘方止城郭廬舍並摧壓死人民無算七月辛未河南地震九月甲戌福建地震十二月戊辰寧夏石空寺堡地大震礮山石殿倒壓死僧人是年兩京地俱震七年寧夏各衛營屯堡自正月己巳至二月己亥凡百餘震大如雷小如鼓如風城垣房舍邊牆墩臺悉圯十月癸丑南京地震自西北迄東南而止隆隆有聲崇禎



元年九月丁卯京師地震三年九月戊戌南京地震四年六月乙丑臨洮鞏昌地震壞廬舍損民畜五年四月丁酉南京四川地震十月丁卯山西地震十一月甲寅雲南地震六年正月丁巳鍾江地裂數丈七月戊戌陝西地震八年冬山西地震九年三月戊辰福建地震七月丁未清江城陷十年二月己丑福建地震七月壬午雲南地震十月乙卯四川地震十二月陝西西安及海刺同時地震數月不止十一年九月壬戌遼東地震十二年二月癸巳京師地震十三年十一月戊子南京地震十四年三月戊寅福建地震四月丙寅湖廣地震五月戊子甘肅地震六月丙午福建地震九月甲午四川地震十五年五月丙戌兩廣地震七月甲申山西地震十

六年十一月丙申山東地震十七年三月辛卯廣東地震

山圯洪武二年六月庚午蘭山崩六年正月壬戌夜伏羌高山崩正統八年十一月浙江紹興山移於平田是歲陝西二處山崩十三年陝西夏秋淫雨通渭平涼華亭三縣山傾軍民歷死者八十餘口天順四年十月星子山裂成化八年七月隴州北山吼三日裂成溝長半里尋復合十六年四月二日巨津州金沙江北岸白石雪山斷裂里許下塞江流兩岸山合山上草木如故江水三日不流木叅盡沒久之其下漸開水始泄六月長樂平地出小阜人畜踐之輒陷明年復湧高山一十七年十二月辛丑壽陽縣城南山崩聲如牛吼

治三年六月乙巳河州山崩地陷九年六月庚寅山陰蕭山

二縣同日大雨山崩十五年八月戊申宣府合河口石山崩  
十八年六月丙子河洲沙子溝夜大雷雨石崖山崩移七八  
里崩處裂爲溝男婦田廬牲畜俱陷正德元年十二月癸亥  
卽墨三表山石潰四年三月甲寅遼東東山大家峪山崩二  
處約丈餘五年六月乙未秦州山崩傷室廬禾稼甚衆龍王  
溝口山亦崩六年七月丙寅夔州獐子溪驟雨山崩十三年  
五月癸亥雲南黑鹽井山崩井塞十五年八月丁丑雲南趙  
州大雨山崩嘉靖四年七月乙酉清源賈家山崩五年四月  
壬申貴州歹蘇屯山崩十九年十二月己巳峩眉宋皇觀山  
鳴震裂湧泉水八日二十一年六月乙酉歸州沙子嶺大雷  
雨崖石崩裂塞江流二里許二十六年七月癸酉澄城麻陂

山界頭嶺晝夜吼數日山忽中斷移走東西三里南北五里  
四十二年京師觀象臺陷臺土移於城外隆慶二年五月庚  
寅永寧州山崩是歲樂亭地裂三處俱湧黑沙水四年八月  
湖州山崩成湖萬曆二十七年八月甲午狄道城東山崩其  
下衝成一溝山南耕地湧出大小山五高二十餘丈三十三  
年八月丙午鎮江西南華山裂二三尺三十七年六月辛酉  
甘肅南山崩天啓三年閏十月乙卯仁壽長山聲震如雷裂  
七里寬三尺深不可測崇禎九年十二月鎮江金雞嶺土山  
崩十七年秦州有二山相距甚遠民居其間者數百萬家一  
日地震兩山合居民竝入其中

雨毛洪武十九年九月丙子天雨絮宣德元年七月京師地

生毛長尺餘正統八年浙江地生白毛成化十三年四月廿  
肅地裂生白毛十五年五月常州地生白毛十七年四月南  
京地生白毛弘治元年五月丙寅瀘州長寧縣雨毛正德十  
二年四月金華地生黑白毛長尺餘